

兩
浙
金
石
志

兩浙金石志卷十八

揚州阮元編錄

元浦陽五賢贊

篆書

天地之間有至鉅而無配者道也人能心會而身履之口
誦而書存之則必浩乎其大巍乎其高淵乎其深非江河
而潤非雨露而津非日月霜雪而光華嚴厲其所著見于
後世者固將弊穹壤亘古今而不窮貫金石蹈水火而不
滅矣予嘗考之於經稽之於史求其如斯人者恆曠數十
世而一見越數百里而一得浦江有縣歷年至淺而受地
至狹非有數十世之久數百里之遠而乃得其五人焉何
其盛哉五人者曰孝子陳公助教節愍二梅公忠惠王公

待制柳公也孝子不知何時人能服勤孝道當二親之亡
哀哭弗輟以衰麻終其身每卽墓奠肴果烏鳥爲之不啄
助教當宋宣和初攝處之松陽丞己而盜發青溪東南諸
郡縣咸望風橫潰公獨嬰城自守以死徇國節愍於靖康
之際爲戶部尙書當金人入寇刼質天子竟乃不勝忠憤
率衆數十萬謀夜擣其營迎歸二帝事泄身殉忠惠克明
正學厯疏諸經及登嘉定甲科遂以及人爲務立朝居郡
綽有可稱勁節高風至今熟在人口待制問道金文安公
上邇朱子之學亦旣身逢盛世以文華國四方學者稱之
至與虞揭黃三先生齊名嗚呼五公之卓卓如此豈非所
謂有道之士哉豈非所謂浩乎其大巍乎其高淵乎其深

者哉使其大施諸用以殫夫潤澤光華嚴厲之功其所著
見可勝旣哉雖其不克大用亦豈弊穹壤亘古今而有窮
貫金石蹈水火而有滅者哉如良者固不足以灼見五公
之所蘊然觀陳公之事親則未嘗不稱其孝觀二梅公之
事君則未嘗不嘆其忠觀王柳二公之爲人則未嘗不慕
其學以稱其孝嘆其忠慕其學之心可無一言擬諸形容
哉借令曠數十世之久越數百里之遠猶將低徊企想以
稱述其萬一而况近在二百年之內百里之閒哉昔梁肅
李華之於四皓也時之相後如是其久地之相去如是其
遠及作爲贊辭以致歆羨之意識者尙或稱之良雖不敏
旣獲親出五公之鄉接其風聲氣澤而頌聲不作人其謂

何用敢勉竭駑力各爲贊一章以明前人光韻之美以伸後學嚮慕之私然以孝爲百行之先故用陳公爲贊首自餘四公則從其世次而列見焉

孝子陳公

大鳴

倬彼孝思天經地義我公履之式昭厥懿無父何怙無母何恃公於斯時病殷痛鉅乃號穹旻口無停聲月益歲增有悴其形衰斬三年古訓是程曾不爲就終身熒熒人亦有言孝行之至可通神明可感異類粵惟我公天相乃志有果每陳烏鳥颺去昔秦顏生同出其鄉亦以孝感烏吻爲傷公雖後起其德則似令聞令望曷其有已千秋萬祀永稱孝子配彼顏氏

助教梅公

溶

咨爾梅公溫溫而恭恂恂而忠有大雅遺風遭世中厄遇
彼寇鋒牧逋令遁以公折衝公謀既決遂往式遏乃以柔
和化爲猛烈亦旣載旆亦旣建節如火之藝如冰之裂力
有不支猶驅義師怒目張膽以死自期曰身可殺義不可
虧帝曰爾溶古之烈士肆命之祿并祿其子以愧蚩蚩而
惜一死人誰不死死貴合義惟我梅公以死柱世前聖有
云殺身成仁夫豈彼人而盡不聞

節愍梅公

執禮

於彼出日其光燉燉妖氛一襲天地爲昏有颺倬然勢豁
九門飛廉不將天步斯屯宋有社稷繼五季而國不知不

識咸順帝則彼豕忽突大邦爲敵血戰未息二帝奄北矯
矯梅公從此奮激指心誓天願出機先手除羣穢捧轂南
轅旣秉我鉞旣脂我牽致天之罰則莫我敢遏如彼颶風
其勢發發將掃氛昏陽光有赫事泄羣庸力屈強兇生義
死忠嗚呼梅公

忠惠王公

處一

肇肇王公碩學粹行以道律身以德施政輪對之明見之
於立朝宣化之美見之於爲郡帝嘉乃烈俾居言責獻可
替否巍巍頌頌諸史之罪上通於天奏章一抗正氣凜然
不忍澆季老奸擅世遂舍而去流水莫繫帝謂王公有遺
直之風錫之土田以旌其忠至今言者猶爲震忝在宋嘉

定士俗靡振公獨屹然進退以正其進也如振鷺之在庭其退也如飛鴻之入冥軼類超倫舉世未聞

待制柳公

貫道

朱學之傳至於文安四葉綿綿公得其師猶水有源際茲休明儒雅勃興乃以所挾揚于

帝庭

帝嘉其能俾居縉紳與鴻碩爲倫莫之與京於樂辟雍曰公是宗髦士三千于千而從頌享月禮公訂古始佐明文治成我

皇之志大江以西政闕敎弛武子之澤一墜於地公往化之有若時雨歸臥窮山垂十五年流水去住浮雲往還鋒

車薦至乃賞

帝制惟公出處關時隆替出與時行處與道俱修爾岐陽之鳳忽焉空谷之駒千載曷窺蜀山巍巍

縣人戴良撰承務郎太常博士臨川危素書前崇文少監亞中大夫同檢校書籍事兼 口經筵口官鄱陽周伯琦
策

右五賢贊一通鄉先生待制柳公高弟子戴君良之所述也初縣學有祠祠節愍梅公忠惠王公及凡宣勞於學者皆雜位其中達魯花赤廉侯阿年八哈尹蕭侯文質以其混淆也屬教諭祝君應昇圖所以易之應昇乃於廟西南偏別闢一祠以奉二公而益以孝子陳公助

敎梅公待制柳公通號曰五賢祠內列三龕龕置神主
俾善書者作隸古題之且思後生小子不知五賢之詳
復奉幣請戴君爲是贊刻石祠中嗟乎長民者不復知
有敎化久矣徒事簿書期會之末以取能名孰肯表揚
儒先以樹之風聲哉書曰不臧厥臧民罔攸勸若今賢
令長之爲非善其善而欲使民知勸者乎贊文雄渾高
古敘事詳明使五賢之行事粲然若青天白日苟來讀
之者孰不鼓舞而奮厲則夫戴君之功又豈在賢令長
之後者乎是皆可書也因爲執筆而識之左方至正十
二年十月癸卯同門 前

經筵檢討權叅贊□□人□□□□

忠顯校尉婺州路浦江縣達魯花赤兼勸農事廉阿年八
哈儒林郎婺州路浦江縣尹兼勸農事蕭文質進義副尉
婺州路浦江縣主簿騎都刺縣尉洪在典史謝瀚教諭祝
應昇訓導張端臣立石

右碑在浦江縣高二尺二寸餘廣一尺四寸八分凡
三列楷書極精每列三十八行行十九字此刻以達
魯花赤欲甄別列祀諸賢屬九靈山人贊之而危雲
林書之也前後有序跋序云孝子不知何許人舊志
云名太竭本縣人武鼎之子親亡終身哀哭每奠果
肴烏鳥不啄頗與顏烏事相類梅溶以薦爲單州助
教年七十餘攝松陽丞徇青溪盜之難執禮死靖康

之難諡節愍見宋史溶從子也忠惠名萬字處一嘉定十六年進士調和州教授遷浙西提舉端平元年轉國子學錄添差通判揚州改鎮江忠伉有大志嘗爲書數千言論江淮邊防事宜三年授樞密院編修官嘉熙元年兼權屯田郎官差知台州四年擢監察御史論史宅之又論史嵩之除大理少卿乞休詔特轉太常少卿致仕卒年四十八諡忠惠著書名時習編及劄論十卷柳公之贊以本朝人文故帝皇字皆提行書之最後列銜首達魯花赤廉阿年八哈者一名溥字景淵北庭人恆陽文正王希憲孫也至正九年涖浦邑廉靖剛正私交不行權幸跼踖民安其生

常刻柳文肅公文集置之學官以存文獻蕭文質字
彬祥大梁人至正十一年任洪在新安人至正十一
年任見宋濂尉司題名記祝應昇姑蔑人至正十一
年任張端臣字正卿本縣人二人並見宋濂學田記
端臣復于洪武初以通書易禮三經舉掌儒學多所
造就惟騎都刺謝瀚僅見此碑耳又訓導之名不見
他刻按元制師儒之命于朝廷者惟教授其學正學
錄敎諭山長則命于禮部及行省與宣慰司故元百
官志無敎諭等員乃敎諭之稱多見元人文集而訓
導則未之聞蓋其時多出自士林之推邑令之請無
定額也

元沈嘉等石屋洞題名

皇元至正壬辰冷食通川沈嘉彭城羊宣河東張齊燕南
孫中古越張朗杭州王皞武林王旬太原王萃同游

右在石屋洞摩崖正書六行字徑一寸西湖志川謨
作州萃誤作萃

元楊朶兒只班等石屋洞題名

至正十四年暮春中臺知印楊朶兒只班偕潭州總管伯
篤魯丁同游

右在石屋洞摩崖正書三行字徑六分

元煥著等石屋洞題名

至正十四年三月六日奉御煥著檢校王謙照磨任壬文

管勾張晉掾史王昀部管勾王昉永嘉陳昧同游南山諸
公俾昧書於石屋洞以識歲月

右在石屋洞摩崖正書七行字徑一寸

元南屏山銘

南山之隈白石鵲鵲上有丹崖下有琴臺彌天然師與我
游哉勒名巖壑庶播將來至正甲午仲春吳興周昌書于
南屏石壁

右刻在西湖南屏山家人卦側隸書三行行十六字
字徑二寸下有琴臺謂米襄陽題字也彌天然師用
道安語也臺字作臺壑字作壑皆爲臆造

元祥符寺碑

嘉興郡治之西北二里有寺曰大中祥符者創於東晉興
寧間哀帝詔剡山法師潛講般若於禁中暨還道過構李
止於郡之貴人家貴人知其有道行爲捨地作精舍居之
及蕭梁世盛行水陸法事遂號水陸院其後至唐會昌而
廢宣宗復天下寺院乃得如故宋大中祥符元年郡疏于
朝請爲御前崇奉所始改今額并賜城西蕩田若干畝故
寺之里至今以華封爲名元豐中郡民魯惟忠割地五丈
充寺南河步號放生池者是也建炎寺燬紹興五年主僧
法瑜重建大殿山門兩廡及五鳳樓鐘樓經藏逮僧奉先
又於大殿後特構無量壽佛殿廿五年知府林衡奏改爲
禪院乾道七年復賜華亭沒官蕩田若干畝寶慶間僧如

道始作僧堂至內附初僧普堪又置新田若干畝於是寺之給養頗裕繼以慧光值法堂傾圯乃治而完之及源澄時大風仆後殿佛像獨得不毀若有陰護之者澄未及興葺而歿其代念常乃銳意經理僅成明樓及歸雲寮而已至正四年行宣政院以今覺曇爲叢林碩德檄選以主茲寺覺曇顧寺宇摧廢食息不安求所以繕興之計遂盡傾鉢貲并募有力者經營十餘年始克於後殿故址鼎建大彌陀殿及作方丈寢室材堅工良皆極嚴邃大殿廊廡木橈而瓦缺負覆之不任者咸易使新之裝飾前後殿佛菩薩及諸龍天法像丹彩精麗金色輝映顧瞻炫眴敬怖俱生禪儀梵具無不儼雅庖庫固漏備盡完綴凡昔之所無

者今既有之而今之所宜有者舉無闕焉余自蒞官是郡數與覺曇語知其簡靜沉毅氣專而守固勤篤而不懈能卽平事功者也蓋自佛教入中國惟傳其書而誦之其後四百餘年始有爲禪學者至其要令學者以心傳心不必求於相文字之末故能一於中而無待於外揅其約而見效者速於是聰睿特達之士往往歸焉而禪學由是盛矣故至于今爲其徒者類能確守師說持堅履實畢力以事其事而無他務焉若覺曇者非有得於此其所就能若是乎然則茲寺之興不獨有以見其經度之勤而又知覺曇之爲樹立者益得其本也由是觀之吾黨之士苟學焉而不知其要仕焉而怠其事泄泄然竊名保位於當世者

視彼寧無媿乎余以其有足勸於人者故樂爲書之況其
請之數也惡得而辭哉若其興造歲月之詳工用材費之
目則具誌碑陰斯可得而略焉覺曇字竺芳俗姓周氏世
爲嘉興人至正十四年歲在甲午夏五月旣望承務郎嘉
興路總管府推官嚴陵方道猷記將仕郎前翰林 國史
院編修官彙城倪中書丹崇文大監嘉議大夫兼檢校書
籍事鄱陽周伯琦篆額

金華陳口刻

右碑文正書二十四行在秀水縣治西南此述覺曇
緝寺事前述寺之由來興廢後述覺曇行業推本于
佛氏之傳心自宋已後支分派別矣此寺舊爲律寺

紹興五年奏爲禪院明洪武間定爲講寺大約本持
住者以立名而今時則嚴如甲令焉

元麗陽祖廟碑

麗陽祖廟之碑

信州路總管府照磨枯蒼林君傳謁選京師以其鄉父老
之意請著銘刻諸麗陽神廟麗牲之碑按林君所述曰處
之鎮曰枯蒼廟山其最尊也距城之北十里郡乘云其先
白塔廟不知所始相傳嘗有浮雲在其上唐大中四年刺
史徐鄣禱雨廟下隨應迺易其額曰麗陽以麗水經其南
故也後八年錄事叅軍姜肅攝州事度地故址之西新其
祠宇而并大之中祠麗陽北山之神左白塔司土之神右

巨潭北沼之龍神三神共享一祠民有水旱疾癘螟蝗盜賊兵革必禱焉其孚格如響北山之神曰靈顯廟宋元豐三年肇封凡十有二初封普利侯次博濟公次四封廣佑順澤昭應善濟王次二改封廣佑敷澤靈濟顯聖王又四改封仁文神武正福忠聖王巨潭神曰施普廟亦十有二封初四封淵應昭惠靈順康濟侯次三封孚澤顯應靈佑公又四封昭惠靈應仁烈孚佑王白塔神曰顯佑廟凡八封初四封善應孚濟宣惠助順侯次二封宣惠廣佑公又二封英顯廣利王神之配及子婦佐屬皆疏爵號通侯小君靈應之蹟班班可考其尤著者宋時應進士舉者禱夢于神窮達得失莫不先知有應夢錄傳于世咸淳中郡中

饑適吳商載米數十艘相時射利未知所適遇一士乘舟
海上衣冠偉甚謂吾處人難其姓將盡糴舟中粟願趨吾
郡商許諾一夕大風徑至甌港民無轉徙之患商物色知
神所爲致祭而去我師取淞東旣內附或震以遷卜於神
戒勿動至元十四年招討趙侯初鎮守也屯戍尙少章焱
季文龍挾淮軍爲亂陳於城東州人大恐會萬戶帥師遠
來至麗水縣境晝霧四塞旣止舍俄一老父指之曰城圍
甚急招討遣千戶來求援乘其所不料此奇計也萬戶卽
起營千戶前導繇徑路突其圍焱軍大亂旣定萬戶問所
遣千戶何在趙侯曰萬戶來且不知千戶非吾遣也或曰
得非麗陽神之所爲乎及詣祠見佐神貺象衣色類所見

千戶迫視之汗猶浹背其著靈多類此云

國家詔守吏致祭名山大川之在祀典者大德五年主者上其事請祀神從之延祐二年請加封於是靈顯廟易正福爲廣佑曰仁文神武廣佑忠聖王神父廣福公加廣福裕後公神母慈惠協應顯慶助佑夫人易封聖善慈惠顯應助佑夫人神妻助正妃加主中助正妃神子協佑助順廣惠侯易封紹靈協佑廣惠侯神子婦協慶夫人加助惠協慶夫人施普廟昭惠靈應仁烈孚佑王易封昭德靈惠仁烈孚佑王顯佑廟英顯廣利王加協忠英顯廣利王佐神昇侯助靈顯佑協惠輔正侯進爵爲公

命書焜煌神人悅豫士民之所報者無虛日余嘗以事道

出麗陽觀平枯蒼之山鴻蒙旁薄綿亘數百里爲一郡之望其出雲雨見怪物禦菑捍患實應祀典我

國家事神治人蓋有

祖宗之成法惟麗陽之神邇在東越而寵賁優渥神貺益昭於乎盛哉余不佞備官詞林謹述其事而爲之銘銘曰聖王制禮秩祀有常名山大川神怪攸藏維枯之山望臨一郡靈秀攸鍾允作雄鎮報功司土龍見而雲三神合食樂康以娛在昔勝國數著奇績通侯小君封爵赫奕

皇受

天命用吳越邦蠢爾冥頑負固弗降晝霧晦昏若有神告彼潰倒戈摧拉凶暴載錫褒諡守臣之言增高益崇繇我

聖元神眷此方田有黍稷穰氣廓清兵燹滅息茲祀終古
唯神是依醴酒既潔牲牢腍肥水孕精金山蔭喬木伐鼓
吹簫惠爾多福肅肅靈旗御龍來口

天子萬壽秩禮孔時史氏著銘爰刻貞石誦厥成功昭示
無極 應奉翰林文字文林郎同知 制誥兼 國史院
編修官臨川危素撰 金華劉文慶書翰林學士承旨
榮祿大夫知 制誥兼修 國史齊郡張起巖篆

至正十四年十二月乙卯中奉大夫江淞等處行中書省
叅知政事恩寧普立 永嘉許光遠刻

右碑篆額六字文三十一行八分書在麗水縣麗陽
廟前此栝蒼林君傳謁選京師而乞危雲林爲文刻

石也前述廟所由始及歷代封爵靈異事並爲宋世
祈夢之所有應夢錄傳世觀吳商載米萬戶援兵二
事枯蒼之人宜其若狂矣

元歸安縣儒學教諭題名碑

古者政教爲一教官之重至與冢宰竝立漢置博士員延
登鴻碩論議朝政尊寵禮遇優於他官後世以詞章資格
取人而政教分矣宋季縣學以進士累舉不第者主之掌
以經術課業教其士任之固不輕也今制縣學置教諭一
員雖選于有司然講肄有程脩爲有章近又以鄉闈亞榜
傑魁之倫充是選其任顧不尤重歟歸安吳興望邑也縣
學舊附郡庠泰定丙寅進士完澤溥化公來丞茲邑乃營

治之東南作廟學垂三十年職教者更十有一人而題名
缺焉至正十三季秋嚴陵葉君瑛由亞榜士昉蒞是職縣
之賢令尹開元魏侯信尤以興舉學校爲己責於是招諸
生禮師儒佩衿誦誦弦流聞民之慕義者捐腴田以助
之良絲善政感人抑亦善教之所致也京兆宇文公諒蜀
產而家是邑 浙省較莪而葉君實備選擇故以題名記
爲請噫歲月易流名德難泯居是官者誠能尊所聳行所
知本之以德行充之以文學宗尙儒先作成後進他日樹
勳揚烈當自茲始葉君尙其懋之并書以告來者至正十
五年龍集乙未閏正月既望奉直大夫 國子監丞宇文
公諒記將仕郎翰林 國史院編修官錢用壬書丹嘉議

大夫海北廣東道肅政廉訪使梁國標篆蓋

右碑上截正書二十七行行十六字

楊元震

字東卿台州路人

沈昇

字

台州路人

湯

嚴

字世英信州路人

張謙道

字克讓信州路人

姚

字利用衢州路開化縣人

徐恕

字如心平江路人

范忠

字則忠饒州路淨梁州人

閔達

字義行饒州路浮梁州人

貢岳之

字有瞻寧國路人

戚持敬

字秉肅嘉興路嘉興縣人

葉瑛

字元英建德路壽昌縣人年廿七歲至正十三年江浙鄉試簡榜第十名十四年六月廿三日之任

韓桐

字景華蜀人

牟魯

字仲望蜀人

江漢

字朝宗嘉興路嘉興縣人年二十五歲至正十一年十二月十三江浙鄉試簡榜第九名至正二十一年十二月十三

日之任

謝廷璇刊

右碑下載分三列第一列十一行第二列四行第三列無字碑首篆書敎諭題名四字在歸安縣學此述邑令魏信修學而敎諭葉瑛乞公諒記之也元史不列敎諭當時只選于有司此碑可證完澤溥化南陽人惠政著稱魏信爲歸安令終日端坐如神人莫敢干以私時定浙西坊里之役以田爲率貧富均一民懷其德焉江漢明詩綜小傳作會稽人洪武初以文學授編修碑題嘉興人當從碑爲是舊志元敎諭以此爲藍本舛謬尤多又書四字本古篆作三亦僅見

也

元紹興路重修學記

紹興路重修學記

中奉大夫前翰林侍講學士知制誥同修國史同知經筵事黃潛撰文

嘉議大夫監察御史月魯不花書丹

翰林待制朝請大夫申屠駟篆額

越於三代之末爲大國漢唐以來爲名郡自宋立學逮至我

朝部使者郡長吏屢嘗交致其力而作新之以其規制宏侈土木之功恆患乎弗繼今達魯花赤大中大夫公蒞治

伊始究心庶政尤以學校之廢興爲己任未及有所設施而中原倣擾淮夷繹騷

天子赫然下明詔遣將出師討之仍命江浙分省宰臣駐軍池陽以遏其奔軼分省檄公俾預在行公斥埃精明周防嚴密以無虞越三歲乃還官下向之所欲爲而未遂者無不以次畢舉摧抑姦豪撫綏疲瘵禁戢州縣阜隸不得持符帖行村落間而田家不聞叫囂隳突之聲比年以兵興供給繁重增創權攝人員猥衆坐廩靡食而民不堪其苛擾公一切汰去之而官府亦無乏事鈔法滯而不通民持錢入市無從得米公驗大家之田糧以等第勸之賑糶使民計口入錢而受米擇監臨之吏置局四隅詭冒旣無

所容單夫寡人均被其惠而免啼飢之苦海瀕不逞之徒
或羣聚而大肆焚掠公部勒官軍民兵直抵其地皆望風
遁去境內帖然公痛懲戍卒潰散者使益爲警備厚恤
民家之殘破者使得以復業郡日中以無事乃謀大治學
舍會屬州諸暨判官前進士許汝霖白事郡府爲公言州
人黃景昭先世故爲衣冠著族而其人輕財尙義儻以禮
招致之諉以茲役必能集事不至匱乏勤民公如其言
招之景昭旣至公卽令發學官公帑所儲得錢以緡計者
若干悉以授之使度材賦功揆日庀事景昭承命惟謹且
捐私錢以助其費公旣親爲之經畫指授因俾汝霖視其
匠傭而程督之由門廡達于朝廷講堂書閣齋廬直舍及

餘屋室百堵皆作未幾而內外煥然一新先是教授四明杜易支傾植仆日不暇給銳欲大起其廢而慮費用之未充莫知計所出幸公垂意於學校遂力贊成之謂不可無以告于來者使嗣而葺之期永勿墜爰買石屬潛以記潛襲者既已援泮水之詩爲前總管尙書宋公記其新學矣請因今公之盛舉而畢其說焉蓋爲此詩者所美不在乎土木之功而在乎魯侯之明其德士之廣其德心孔子曰遠人不服則修文德以來之惟夫魯侯與其多士上下相成以德是以旣作泮宮而淮夷攸服也公固嘗陳力就列有事於淮夷矣暨撤戍而歸口不言功惟汲汲焉以植教基淑士心爲務豈非有志於修文德以來遠人乎章甫

逢掖之流息斯游斯方相與鼓舞於鳶魚飛躍之下而望公之卒成其志蠢茲淮夷本吾

國家之赤子有能聞公之風慕義而來格則公德教之所加寧有此疆爾界之間也哉潛不佞謹爲叙次其興造之大略他日將有鴻生茂士鋪張偉烈播於弦歌以配魯人之頌者焉公名九十字子陽以至正十年三月來領郡事而以十四年還自池陽脩學則始作於十五年之三月訖工於是年之十二月云

至正十五年十二月 日宣武將軍同知紹興路總管府事迭里迷失奉議大夫紹興路總管府治中搭的迷失海牙武略將軍紹興路總管府判官燕帖木兒承德郎紹興

路總管府推官姜獻臣承事郎紹興路總管府經歷韓欽
提控案牘兼照磨承發架閣樊恭學政王綸學錄李允
郡士王良翰夏泰亨楊淵富處善韓夏立 會稽范文遠
刻

右碑在紹興府學二門西側文廿九行正書徑一寸
二分黃潛撰文月魯不花書丹申屠駟篆額後有同
知治中判官推官經歷照磨學正學錄及郡士等立
石題名碑載達魯花赤大中大夫名九十字子陽於
至正十三年三月來領郡事十四年自池陽駐軍還
十五年三月始興修儒學訖工於是年之十二月也
史載黃文獻自將仕郎七轉至中奉大夫此文乃其

歸田後所作故系銜加一前字月魯不花字彥明蒙
古遜都思氏少隨父戍越因受業於韓性爲文下筆
立就粲然成章登元統元年進士第歷官至浙西肅
政廉訪使改山南道廉訪使浮海北而往遇倭寇不
屈死事載元史列傳申屠駟署銜翰林待制秩正五
品朝請大夫秩從四品若由紹興總管府推官升擢
超越二階不知中間曾轉何官也

元杭州路重建廟學碑

杭州路重建廟學之碑

承務郎江淞等處儒學提舉王大本爲文

光祿大夫江淞等處行中書省平章政事提調行宣政

院事江淞都財賦事康里慶童書

通議大夫江東建康道肅政廉使訪周伯琦篆額

皇元旣屋宋社稷大一統而臣萬方置江淞行中書省于杭以鎮撫其民而封建厥福乃卽宋京學爲杭州路儒學而省憲率郡有司以告朔謁謝于斯以春秋釋奠于斯以育才羞考而興賢論秀于斯於是杭學遂爲一行省首善之地而非他路儒學所可昆弟語矣自時厥後有廢有興或仍其舊貫或因而改爲其規制位置猶未克丕變視雄藩大閭外執政之居命之敎而爲學者爲弗稱不有君子其孰能立隆敎基于虐燄灼天之後作新士氣爲儒林拔萃之舉乎至正十有二年弄兵之盜濫觴于河南而橫流

于江表旣三關不守直抵杭城待暴不豫民無固志遂焚
蕩我省治延燎我比閭而杭之廟學毀焉曾無一瓦之覆
虞業窘于煨燼石經委諸焦土屬戎務方殷未遑興復士
類無所依歸彝倫失厥攸敘否傾而覆圯極而崇所以默
相斯文者天意固有所屬矣朝廷以杭實東南甲郡地大
人衆供給浩繁師帥之重每慎厥選十又三年癸巳之冬
制授中大夫杭州路總管康里公實來旣視篆釐務作而
言曰興舉學校承流宣化之大者也其可諉以百姓新免
毒蠱瘡痍未瘳而謙讓未遑乎旣以其事具櫝行省移文
憲司示不敢專遂經始度地略丈數物土方揣高卑議遠
邇左廟右學一循國學之制攻位而位成乃量功命日須

材計傭慮財用儲餼糧遴工師量事期以令役于有司首
建禮殿尊祀先聖先師東西兩廡從祀位焉丹楹刻桷清
廟有嚴金榜朱扉戟門斯闢煥前規而高廣宏壯視舊址
而恢廓平寬信乎垂憲萬世賢于堯舜人存政舉道隆則
從而隆者矣先是外之石靈星門距戟門爲不遠至是則
徙遷而南其深八丈有奇由公買地以拓充之也若夫學
校之建則明倫之堂宏敞高亮以隆迪教講道之原設大
小學四齋以嚴授業辨惑之會庖廩有所倉庾有居先賢
后土有祠來朋見賓有門中唐有甃泮水有梁而學校之
制大備焉蓋經始于十四年之五月而落成于明年之五
日是役也行省憲司咸樂善以成其美倡義以佐其費同

寅協恭懋相斯役府判官張公思誠則又爰始爰謀爲之
矩矱而典其規程也予謂郡縣有學學必有廟而杭之廟
學乃卓犖輪奐於極廢大壞之後一時釋老之官燬于回
祿者衆矣其徒悉力化誘皆蓄縮弗克有爲賢太守抗志
作新卓卓自任學計幾何而能化約而裕多助之至非有
福田利益以歆動之也信乎聖人之神於昭在上如日月
麗天照臨之下莫不心開目明樂成其美先師有相之道
則五星之芒寒色正者也秉彝好德固人之所同人道敏
政地道敏樹於賢太守之有猷有爲良足徵焉公名帖木
剌思字周賢康里氏故平章軍國事贈純誠佐理同德翊
戴功臣追封東平王之孫陝西行中書省平章政事忠定

公之子世篤忠貞勲業行實載在國史公累遷清要而居是任觀其勇于見義樹功吾道而克濟其美淵源有自來矣杭之人士相與言曰是舉也官無廢事民不知役而吾黨與有光焉其可無述以敎公功乃斲石樹碑以圖不朽子實提學江淞徵子文以志之不敢以庸陋辭繫之詩曰維昔盛時建學立師以立治本以崇化基學必有廟聿嚴茲祀重簷複殿神靈爰處東南都會甲郡惟杭首善之地萬民之望更化云初未遑改作因陋既久靡究靡度斯學斯廟具體而微廢興殊致倚仗一機變生不虞竟燬于盜煨燼灰寒孰念厥紹天錫賢侯維藩維宣嘉惠斯文不忘不愆乃亨其屯乃傾其否瓦礫之塲化而棟宇昔黯今煥

昔圯今崇多士稽首太守之功我爲銘詩勒此貞石宣昭
義聞永永無斁 至正十五年 月 日杭州路同知朶
羅于治口成大用判官張思誠推官楊維經歷王明善知
事丁鉞照磨解復郡史楊迪郎盼沈博王惟賢吳天瑞東
南錄事達魯花赤阿老瓦丁吏完顏本仁教授賈天祐學
正胡黼學錄楊英直學鄒斯永學吏計禹疇夏文裕立高
平范伯仁鐫

右在杭州府學正書三十一行行五十四字字徑一
寸篆額六字此述總管帖木列思脩學事府志作特
穆禮斯譯音同也按文云字周賢康里氏故平章軍
國事東平王之孫陝西中書省平章政事忠定公之

子潛研堂金石跋尾云東平王者不忽木也忠定公者回回也回回諡忠定不見于元史宋濂撰神道碑亦未之及回回字子淵泰定時亦任江浙行省右丞慶童字明德康里氏至正十年遷平章行省江浙並見元史著有勞績列官題名見舊志者王大本阿老瓦丁而阿老瓦丁列于平章政事中此書東南錄事豈二人耶其餘同知朶羅于治中成大用判官張思誠推官楊維經歷王明善知事丁鉞照磨解復教授賈天祐學正胡黼學錄楊英俱可補志之佚

元重建武佑廟碑

蕭山縣重建武佑廟記

從事郎前江淞等處儒學副提舉劉基撰東平董晉篆額彭城劉儼書丹

餘暨東北百里爲蕭山縣其山曰北幹之山浙水帶其陰
湘湖匯其陽東望會稽至于大海日之所出其上爲星紀
婺女之辰故其神甚靈能祛疫癘作雲雨人有所必應故
立廟于其山尊其神曰北嶺將軍歲時祀焉宋徽宗時方
臘反睦州自睦入杭具舟將度江吏民大恐怖相率禱于
神比寇至卽有風逆其舟且見甲士列岸上甚衆乃止不
敢渡寇平知越州劉韜上其績于朝賜廟額曰武佑廟後
封顯應侯再封靈助顯應侯

有元至正十二年□□□□江浙行省烽火通于蕭山

百姓驚駭奔竄市井皆空主簿趙君誠至縣甫八日卽自
往西興募民禦寇而江上守兵甚寡弱無賴子皆競起爲
剽劫且應賊衆洵懼君詣廟卜于神神許之吉衆心稍安
君乃分遣人捕無賴子爲剽劫者悉誅之有自賊中來言
賊欲遣兵攻湖東見江岸列甲卒旗幟如睦寇欲渡時以
故畏憚無東心及賊退邑人皆德趙君曰吁茲維神之功
予何庸焉明年夏大旱君往禱輒得雨衆益信神之靈而
大敬趙君之能以誠感神也元統甲戌之春天大雨雹廟
毀惟神所居室獨存君每至廟謁念無以報神貺迺以其
俸錢作新廟邑人亦大喜爭致助十有五年春廟成爲堂
三間三門兩廊像設器用備所獨存室仍其舊繚以周墉

斄以瓦石植以嘉木丹堊輝映於是吏民趨走承祀益肅
以虔時三月壬寅予自杭還越過蕭山而廟適以其日成
故趙君請予記按祭法有能禦大災捍大患則祀之今神
能降雨澤蘇枯槁又能以陰力却賊以保全其民物所謂
禦災捍患孰有大於此哉廟而祀之誰曰不宜趙君能愛
其民故能以敬事神而獲其佑可尙也已予故喜而爲之
記而復爲之詞俾歌以迎享送神其詞曰

青山兮幽幽綠蘿含烟兮樹木稠望夫君兮悵悠悠巖阿
寂寞兮使我心愁雷爲車兮雲爲馬輕霞動兮江色赭神
之來兮風振野吹竹兮彈絲女巫舞兮紛陸離莫芳醴兮
薦潔粢畱靈脩兮俾純嘏驅魑蜮兮逐狼虎弭毒癘兮時

賜雨禾麻成兮息桴鼓物既備兮禮無愆和熙洽兮洞淵
玄爲城爲柱兮式恆且堅保佑我民兮樂以永年

至正十又七年歲次丁酉臘月望日登仕郎江東建康道
肅政廉訪司經歷適里古思立石

越人王元良鐫

右碑篆額九字文二十四行正書在蕭山縣北幹山
本廟按廟始于宣和間劉忠顯幹上其靈異賜額武
佑後又述主簿趙君禦敵禱雨之事碑所由作也至
正十二年下錐去五字下云江浙行省烽火通于蕭
山此方國珍受降復劫衆下海時豈後復降而諱之
耶舊志又名厲將軍廟見輟耕錄謂爲秦人厲狄九

成與伯溫同時豈未之聞耶抑儒者有所弗道耶

元周伯琦靈隱題名

至元戊戌二月廿三日浙省叅知政事鄱陽周伯琦伯溫
將鎮中吳專別允若教師重游香林題名厓石以紀歲月
是日就謁觀堂菩薩慧炬篆理公新岳記靈鷲主者友口
來會從遊男宗仁宗智

右在三生石摩崖隸書九行字徑二寸按續宏簡錄
伯琦子宗仁字克復官山東行省郎中篆書宗家學
然不逮其父慧炬諸暨人住理公巖洪武初海潮衝
岸壞民居廬爲潮神說三皈戒楊枝洒處卽止不崩
時稱炬菩薩見靈隱寺志

元周伯琦理公巖記

理公岳晉高僧慧理師嘗燕宋焉在錢唐虎林山天竺招提之東南玲瓏幽邃竹樹岑蔚至正九年上人慧苾來居觀堂起廢緝甬爰開是山巖窈窕縹緲如堂如唐皇雲涌雪積發滌霽蘊後七年丞綏寧楊公之弟元帥伯顏清暇游悒挾奇樂靜捐金庀工載鑿品石刻十佛及補陀大士象金碧炳赫悅躋西土冀徼福惠賜我重親利我軍旅冰釋氛沴永奠方岳岳之異勝誕增於昔爲虎林奇觀寔苾公軌行精懇有以致之居毗號曰菩薩蓋非夸益天竺和尚允若師臘已八十與苾同志徵文未久乃篆諸石浙省叅知政事番陽周伯琦伯溫記并書

右刻在西湖靈隱理公巖摩崖篆書十三行字徑三寸是記書于至正十八年二月廿三日見三生石題名伯琦精篆學篇中以竹爲竺尚爲獎潔爲洩瀘爲蘊夸益爲誇溢皆根柢說文不涉俗書者

元西天元興寺銅鐘題記

太師開府儀同三司上柱國錄軍國重事中書右丞相和寧忠獻王脫脫爲江浙等處行中書省左丞相時以開山住持僧西天高達摩實理板的達之請於延祐己未春三月建西天寺至正壬辰燬於火戊戌王之子儀同三司江浙等處行中書省右丞相兼知行樞密院領行宣政院事節制諸軍便宜行事達識貼睦邇顧瞻感慨捐俸鼎創以

繼先志更扁山曰清平寺曰西天元興口斬皇帝萬歲皇
后齊年皇太子千秋風調雨順國泰民安提點僧公哥古
魯住持智明普照大師依仁屹刺識巴講主 監造朝列
大夫同知浙東道宣慰使司副都元帥于應辰 大元至
正十八年十月初三日置

右在萬松嶺烏龍廟中正書陽文二十三行行字不
等樂上下有梵書字一周未詳寺本名元興據成化
杭州府志故宮五寺元興卽芙蓉殿故址楊總統所
建至正壬辰燬于火十六年張士誠逼杭達識帖睦
邇棄城遁此寺作于十八年以西僧之請故加西天
二字于元興之上蓋權歸張氏時作也厲樊榭跋謂

既燬而創僅及朞月益十六年爲丙申上溯壬辰爲
十四年中歷四年記憶之誤耳文云顧瞻感慨以繼
先志按元史脫脫本傳載多惠政明許復齋元史闕
幽惜其澤不廣于天下仁宗之過也而達識帖睦爾
以至正七年來爲平章兼知樞密許以便宜行事未
聞輯和人民訓練軍實卒致僉人肆橫禦侮失宜棄
城飲鴆安在繼志之可稱哉樊榭謂貢師泰玩齋集
有建寺碑載高達摩實理板的達居山中久一旦拂
袖去莫知所之後有見之秦隴間者蓋已百餘歲矣
達識帖睦爾重建時又于殿左砌屋四楹奉祠先王
割田供祀皆可補此記之缺

元鄭德峻墓碣

有元竹隱鄭處士墓 鄱陽周伯琦書

右在西湖青芝塢篆書二行字徑五寸款字正書成
化杭州府志云在玉泉山碧梧原左丞周伯琦題曰
有元竹隱鄭處士墓通志作元處士鄭德峻墓處士
事蹟舊志無徵按張光弼集有鄭竹隱處士墓上作
云何慙南渡舊名臣奕世居然保縉紳五福備身宜
爾壽一經教子異他人蛟螭鼎嶺碑文古松栢陰森
墓道新彈指浮雲今古事幾家荒艸卧麒麟觀此則
處士亦南渡世胄也又方回桐江續集有簡鄭高士
眞一二首味詩意先居北山而後遷湖東城下者未

知卽此人否

元處士陶德玉墓碑

元故處士陶君墓表

翰林侍 講學士中奉大夫知 制誥同脩 國史同

知 經筵事黃潛撰

前賜同進士出身徵事郎江潮等處儒學副提舉劉基
書并篆額

有篤行之士曰陶君諱德玉字文立其子鉉謁予金華山
中拜且泣曰先君有學行文章嘗有志於當世不幸年三
十有四歲而卒越三十有一年不孝孤始卜葬于所居東
口口之原非敢緩也蓋其執然也鉉生二歲而孤母口氏

守義不移以長以教比于成人知先君之喪口淺土未有
葬地日夜哀感以求之初口山小嶺欲以治葬而龜筮不
從遂弗果復買山畱賢而龜筮又不從未幾先祖考卽世
先祖妣亦相繼而歿以連遭家難歲且薦饑兵革並起不
克奉先君喪事常銜哀茹毒顛連困苦乃至食不甘味卧
不安席人或見而憐之一日遇善相地者指示程嶺卜之
協吉乃買田口口二畝以易其地明年春奉先祖及先祖
妣之柩合葬於斯而以先君附葬焉先生以文鳴當時其
文口傳世敢口先生之口口表見于後予以老疾辭銓又
泣而言曰銓母氏亦讀書通大旨知先君之事甚悉銓勿
奉母氏侍側嘗聞母氏告之曰汝父性資溫厚氣貌豐腴

又美鬚髯且頎然其大人望而知愛之從學於口先生翁
秀卿治尙書應進士舉於六藝之事亦兼通之書習唐詩
倣六朝爲文辭立理趣嘗辟郡文學不就人咸期以遠大
之業平居事大父母及父母至孝待兄弟篤於友愛處宗
族恂恂愿恭口口口善談論尙氣節與人交重信義尤
倜儻好施與當其時困於徭役家道不振日久候父母顏
色喜愠視家所有無盡出吾私帑給費雖筭奩之物亦所
不吝也故汝父歿時吾匱乏幾不能存零丁孤苦經口口
口養老慈口口二十餘年始得治產業自樹立於是嫁女
娶婦使有家室人皆知吾之不易也昔汝父口口口吾治
湯藥抱汝立於旁汝父因指汝顧謂吾曰我殆不起此疾

宗祊之計以此爲託我以詩書自口未嘗敢爲不義此爾
所知我不及見兒之有成後當以我語告之吾知汝父孝
友忠信其德宜享有後口口口口口口吾將有待於汝也
汝其毋忘乃父之志宜修身慎行以扶口而封植之汝父
斯無憾矣汝口口口口泣而識之不敢忘今母老矣先君
之葬有月日幸先生惠念先君哀母氏及不孝孤艱苦植
門口口得口口子口事願先生賜之文不惟先君之澤有
永弗墜抑亦使後之人知今所以葬先君者口口口口庶
有以惕勵而保守於無窮焉此不孝孤之大願也敢因以
請子辭讓不獲按陶氏系出晉八州都督侃五季之亂由
九江徙居台郡臨海縣之長潭君曾祖諱鄧老宋贈朝奉

郎祖椿世稱長者父熠亦隱德不耀人皆謂君祖宗之德
澤宜大發於君而又不得壽以死豈其出於天者不可得
而信耶雖然君生能盡孝動必求合於禮度死得賢妻守
節自誓以不墜其家聲又得銓爲之子生二孫湜濤幼已
岐嶷是爲善無不報其出於天者益又可必也烏乎人之
爲道莫大於孝弟而莫重於節義始於一鄉推之四海用
能感天地動鬼神致祥召和受福于身流慶于人又奚必
予言之示勸而亦豈獨能庇賴其子孫也哉

至正十八年歲在戊戌 月 日男銓立石 阮茂林鐫

右碑篆額八字文正書二十九行在臨海縣西鄉程
嶺下文云陶氏系出晉八州都督侃五季之亂自九

江徙居台郡臨海之長潭則陶爲著姓而元季惟南村一人外無知名者南村實居黃巖世多傳爲天台人輟耕錄述宋王質紹陶錄中栗里譜亦云陶氏自侃以武功擅世後裔稍襲而靖節贈長沙公詩序則云同出大司馬漢高帝時陶舍也命子詩則白長沙公侃丞相青慤侯舍及于豕韋陶唐而上蓋淵明白數典而據其所聞後世則卽其最著者而系之也洪筠軒云陶凱字中立臨海長潭人明洪武初召修元史除翰林應奉文字陞禮部尙書見明史本傳

元左丞潘元明政績碑

元資善大夫江淞等處行中書省分省左丞潘公政績碑

銘并序

朝列大夫僉嶺南廣西道肅政廉訪司事宇文公諒撰
中奉大夫江淞等處行中書省叅知政事周伯琦書并
篆蓋

淞以西擅富強自唐更五季至宋渡南而吳興去宋行都
最近苕霅兩水分貫郡城宋諸王公鍾鳴鼎食邸第相望
舟車往來烟火相接故吳興郡城舉起於洲汀浦溆之上
而其版築之工楨榦之力最爲堅完視旁郡有所弗逮然
自

世祖皇帝一天下以六合爲家九州爲宮於是所在城郭
更久圯毀至正十六年吳陵潘公自平江督師往吳興時

苗軍所在肆暴而吳興則尤甚焉其民逃命鋒鏑僅獲存者往往劓鼻截耳罕逢完人公於是年春三月六日南出葑門旌纛戈矛鑢征笳鼓樓船噴波虎旅按施夜抵松陵左江右湖水相接夜氣澈晏月懸中天龍伯之官鮫人之室淵示水妃帖妥效順舟過垂虹橋公睹僧寺淨屠蔬起于江之滸星梯風磴高幾切雲公彎弧向空抽矢一發正中塔顛三軍譁呼人百其勇旣抵吳興駐兵郭外翦剔按撫不亟不徐迺以夏四月十有九日公統兵入城清盪苗頑慰安一郡宣布德澤多方招來息黥補劓庶幾更生膏流節離沃浣綴續寒者煦之饑者飫之民固已戴仰公扶樹也已公深惟城池所以設險近緣兵興頗事版築然

吳興爲郡歷年滋多曾無藩籬之限公旣捐安其民人卽經構其城郭迺以是年冬十有一月之八日審勢度宜有事版築必誠必信久遠是圖都事吳陵張瑛掾史袁孟熙從公宣力樹旗定方萬夫畢集指顧之下荷畚成雲揮鍤成雨築杵應和力均心齊甫四視朔土工告完城啓五門聿嚴啓閉南曰定安示永奠輯其民也西曰清源示茗嘗水所由分也西北曰延禧示遙拱之意也北曰臨湖示水所由來也管鑰中嚴關鍵內密仍建四水棚南受餘不溪水西受茗水北受霽水其東則爲運河吳興本澤國而水於城築後悉由其道此吳興之爲金城湯池極爲險固也已先是城南畢工而寇卒至內逆糾聚實繁有徒公卽擐

甲登城身當矢石偏裨以下踊躍奮與戎陣嚴明號令齊截寇始作氣若能搏人公親提枹鼓誓與此城身不偏完大戰城下寇皆崩奔自相蹂踐什喪五六寇旣膽破民始獲安後一再來悉殲城下於是官吏軍民父老士庶舉皆言曰向非公銳意築城設險衛我則一郡生聚皆爲寇所魚肉也凡公府學校百廢具舉麗譙之樓燬久又從而新之公在吳興今已三年不矜功名口耀遷轉日延儒生講切忠義日練士卒俾成功名信賞必罰恩威著明檢身齊家禮法明遠抑亦可謂良將之才賢牧之器也已夫方岳牧守當太平無事之時布政出治綱舉目張率循敷先舉無難者及兵戈擾攘民無固心士無確志伍符尺籍動相

紛拏而能披草萊建城郭却外寇完民人夫若然者在古
猶爲罕見何況於今然則謂公爲良將謂公爲賢牧非溢
美也已今江湖丞相世秉忠貞望重廊廟當分陝之寄任
柱國之權以公勲德不勒之金石無以章示永久於是命
吳興守臣袁公政績使來乞銘乃爲之銘曰

天目之山作鎮於泰鍾英毓才世用攸賴才英伊何是惟
潘公氣捍海潮育吞雲夢凌風六闢大江飛渡鐵馬金戈
百靈斯助遂壘吳興拊安遺黎民久不繫公來復炊閭巷
燭撤公來復屋市久不貿公來復續農輦于野待公復畊
士輟于室待公復生惟天設險必依城府乃新版築乃建
樓南萬杵相和楨餘孔堅百雉林立其高隱天民有誠郭

如魚有水封禺之山封禺之里公活其民民懷不忘播之
聲詩更久益臧

至正十九年歲次己亥五月庚午

儀同三司江浙等處行中書省左丞相兼知江淞行樞密
院事領行宣政院事提調江浙都府達識帖穆爾立

郡人陳真趙璋刊

右碑在湖州府署二門側文二十七行正書徑寸碑
記分省左丞潘公修郡城事末詳其名按秘閣元龜
政要至正十六年三月癸巳張士誠來自高郵改至
正十六年爲天祐三年國號大周以蔣輝潘元明爲
左右丞又郡城迎禧門有僞周題記稱左丞潘公旣

克吳興而分鎮之天祐三年冬十一月十九日築城
明年春二月城成開迎禧門此碑所稱潘公益卽元
明其築城年月與天祐之刻合惟此爲達識帖穆爾
所立時在至正十九年士誠已受招安去僞號而文
中敘述元明戰功政績頗多粉飾溢美之辭周伯琦
叅知政事乃達識帖穆爾承制時所假其書法擅名
當時著有六書正譌說文字原二書行世

元賀秘監祠堂碑

賀秘監祠堂記

承務郎江浙等處行中書省左右司郎中劉仁本撰
奉議大夫僉漕東海右道肅政廉訪司事史銓書

中奉大夫江浙等處行中書省叅知政事周伯琦篆

唐秘監賀知章字季真世居四明小谿湖上性曠達無俗
韻嗜酒善緣草書晚年尤誕放逍遙夷猶自號四明狂客
嘗擢科累官太常博士開元間以禮部兼集賢遷太子賓
客授秘書監天寶初一旦棄官去若弊屣著黃冠道士服
請易居宅爲千繩觀詔許之仍賜鏡湖剡川一曲蓋其抱
高世絕俗之姿瀟灑出塵之表儀形丰度鸞翔鶴峙蟬蛻
污濁之中神遊八極泥塗軒裳浮雲富貴翩然高舉介然
遠引而不顧者也知污世之不可爲也故寄述老子以遊
方之外知玄宗好誕將必咈其請也故託爲夢帝所之說
以歆動其聽不能終遠其鄉也故又請鏡湖剡川以居之

清風高致千載而下聞斯興起迨宋紹興間郡守莫將訪
其讀書故地闢逸老堂于城西隅月湖之曲與李太白同
祀蓋取白稱其爲逸老也寶慶中守胡桀又更爲隱德堂
以漢四皓黃公並祀蓋擬其同郡同德也旣而燬廢尋屬
其址爲驛傳至元更化因之弗改至正十九年冬江浙行
中書省理問官王楠奉省命繕脩館舍得碣像於蕪磯中
爬挈刮滌衣冠儼如卽驛東偏別作祠堂三楹以專祀徹
黃公李白位設椒醕奠之昭崇敬焉於是吞吐湖光以據
十洲島嶼之勝而雲烟月露徘徊於斗牛之間者尙想先
生之風可陟也彼車塵轍迹宦途鞅掌過祠下趨館穀寧
無一二竦息者乎而王君能表而出之其志爲可尙已徵

記於余辭不獲而爲之書至正庚子七月既望記

鄉老胡世佐孫蒙鄭覺民迺賢揚彝立石

徐仲裕刻

右碑篆額六字文二十一行正書在鄆縣按秘監祠
肇于紹興十四年郡守莫將更新于寶慶守胡渠元
至元十三年以是堂并後涵虛館改置水馬站分南
北二館而祠廢此巨楠奉省命繕修而仁本記之也
洪錡軒云仁本字德元天台人元進士爲方國珍叅
謀至正庚子仁本治師餘姚作雪詠亭集名士四十
二人修禊賦詩爲續蘭亭會有圖刻石傳世

元康里公勉勵學校碑

御史大夫康里公勉勵學校記

紹興路儒學教授朱鐔撰 承務郎江南諸道行御史
臺監察御史李觀書 朝請大夫江南諸道行御史臺
經歷伯顏篆額

聖朝混一區宇誕敷文教內而京師外而郡縣莫不有學
天下文物蓋彬彬乎三代之盛矣紹興爲浙東甲郡
先聖廟在郡城之南而學麗焉宏深亢爽尤非他郡所及
比者

制遷南臺于紹興學校日嚮興舉屬以兵革擾攘奄至廢
弛鐔繼任教事念無以爲脩崇稱

上意旨夙夜靡遑至正十八年冬 康里公以

朝廷碩德重望來爲御史大夫下車之始百司恪共
年春爰率僚佐祇謁

先聖行釋菜禮旣而上堂上進諸生而首曰建學育才古
今盛典惟爾士子慎毋以時事之弗寧而進脩之或惰其
懋勉之哉顧瞻堂宇一皆毀廢之餘則爲之惻然吁嘻俾
卽修治會寇逼城池而止幸公威德久孚而總戎叅政
呂資善奮其忠勇寇潰民安迺十有二月旣望公仍蒞學
又明年正月十有五日禮亦如之諸生請誦旣畢公迺命
酒勸勞郡官曰學校興廢風化繫焉今諸生之業于茲者
旣復其家俾得遂志於學善矣然而宮宇久弊不以時葺
何居於是郡守奉命惟謹經畫營度因學舊所儲材次第

繕修不閔月踰時而傾者支缺者補湯沸者鮮華勞費不
甚而工用速成賓師有養政教漸至復興焉公於暇日詠
歌之餘又大書廟額俾揭儀門翰墨雄傑聳耀觀觀咸知
公之究心於學校殆無時而或忘矣蓋學校政教之原

國家之所崇尚兵興以來視以爲非當務所急者有之矣
今我公負匡世之才來振臺綱明政教於擾攘之日蓋將
脩文德以懷柔凶悖可謂知所本哉此其功效之大豈徒
斯學之士有所賴而興將見大江以南司風紀之任者於
是而知所勸矣勉勵之道孰加於此惟公之紀綱政事豐
功偉績可以載之竹帛銘之鍾鼎者非鐫所得僭述敢以
公之勉勵斯學者書其實而刻之以昭公之盛心於無窮

并紀一時僚佐名氏于左公名慶童字明德頌曰 於莽
皇元廣輪無垠於越之墟江塹海濤廟堂有引儒林蓁蓁
孰隳其完孰圯其輪師旅之興強戍攸因我公實來紀綱
維新校宮是圖聿昭彝倫再三戾止誨言諄諄申勗師徒
敦禮縉紳士類抃喜泮水爲春歟起陵夷任惟其人乃揭
于門大書輪困勢莊而凝儀鳳祥麟觀瞻歎嗟煥燿莫隣
茲焉何亨曩焉何屯肆由我公媚于

聖神文德以脩王章是遵可訓可述不刊不湮願垂久遐
頌言斯陳

中丞王思齊 侍御鐵穆烈思 經歷奧林 都事李朮
魯昱 照磨崔約禮 管勾不花 完哲 陳脩 監察

御史鎖飛 篤魯彌寶海涯 衡公輔 李完者帖木兒
忽都不花 顧顯祖 徐伯顏 速來蠻 崔約禮不
花 亦普刺金 阿合馬 劉貞 李烈 傅敏學 孔
汭 姚阿速不花 觀童 中丞丑的 侍御杭州不花
治書按察海牙 經歷伯顏 都事劉秉彝 王伯顏
不花 照磨薦烈圖 監察御史赫斯 那木罕 黃希
賢 李觀 薩兒搭臺 長壽 劉克復 月忽難
至正二十一年正月日立石 學正葉子明 學錄鄭安
東越王元良鐫

右碑文正書三十行在紹興府學校文康里公欲修
治會寇逼而止者是時方國珍據餘姚上虞以曹娥

江爲界也又越年而經畫營度漸至復興所謂脩文德以懷柔凶悖者鑠亦善于措詞矣元制行省設御史臺此云制遷南臺于紹學至正十六年所移見元史百官志題名四十餘人則舊志之未錄者也

元徐府君廟碑

當境徐府君廟記

三代立社樹其土而木主之故神依而靈焉中古易以石後世創宮室 像肖王侯之居州里咸有之台臨海之康功社不襲於木石廟獨嚴 主斯社者襄陽府君府君襄陽神也徐姓子疑而問諸父老曰宋建炎初 檄義兵守襄陽衆泣誓必死及往禱府君賴神庇生全咸戴

德

功社于山之西號上宮若寧邑沙村郡東
別置中下二宮自府君司吾禦害防患顯有威惠
且雨澤應禱如響蠶穀屢登他境莫之若棟梁

楹桷彫剝傾頓不足以揭虔妥靈非所以致崇極之意

良彙衆工宣力脩治幾二十餘年而廟庭漸

圯祈日懼厥

果補葺復遶

翁

規

畫募田及

木理其破缺塹折以無廢前

無

後觀而

已予曰徐固伯益之後國夏毀周世三衢有偃

王廟徐

之公族散徐楊二州聞卽其居立先王廟府君其偃王之

冑歟或曰宋真宗爲虜所追遁襄陽幸府君廟神嘗翊靈

助順以泥馬夜走三十里追南狩立廟行在所嗟乎偃王

遺澤布在方冊府君事 宏著前列如昌黎之潮陽柳侯
之羅池其功在社稷通祀者一也府君又致顯茲土鄉人
報事惟謹抑何以異於峴山漢水也哉父老曰然請紀其
績乃系以詞曰丕休祉哉襄陽之主此邦之人涵德歸美
兵脫鋒鏑爰載分祀報神之功司我康土靈貺孔揚夙昭
捍 巍巍上宮衮龍煒 粉榆母敦貽 福利鑱之堅珉
以克永世

至正二十一年辛丑歲七月望日欽田汪繼道撰 人

明遠書丹

上缺 立石 觀壽鑄珉

右碑文正書廿行在臨海縣東鄉康功徐府君廟內

予按古者立社多以木石宋元以來多以神實之此文猶能述其所自而以神徐姓遂疑爲偃王之後誠齊人之說也又引宋真宗遁襄陽以泥馬夜走三十里則無稽之談于瑞應圖崔府君之外又增一妄矣元慶元路興修儒學碑

慶元路儒學興修記

奉直大夫温州路總管管內勸農事兼防禦事劉仁本撰并書

中奉大夫江浙等處行中書省叅知政事鄱陽周伯琦篆額

至正二十有一年秋九月四明郡博士連君雲以江淞

行中書省平章政事銀青方公命興脩學宮既成其冬十日望行釋菜禮于先聖先師廟會

朝廷遣使進平章公爵司徒具狀徵記於仁本維昔者

聖王口治天下必先脩崇學校者誠以首善之地性命道德仁義禮樂教化風俗人材政刑所自出口口口口口口

口口口口口口口理詩書六藝之文尊君親上之道故

鄉射飲酒春秋合樂養老尚賢務農敦本校藝造士口口

口口口口口口在學焉口口則學不可一日或廢也舜

命契曰百姓不親五品不遜汝作司徒敬敷五教在寬五

教者父子有親君臣有義夫婦有別口口夫長幼之序朋

友之信是也五者根於人心所固有而或昏迷氣質溺蔽

物欲必待上之人勞來匡直輔翼口德而後口口則司徒之職政教所繫爲甚重也蓋公以至正十八年領節鉞來鎮四明于時盜發汝潁蔓延口口口口

廷命公保釐茲土旣至謂孔子廟及學慨然嘆曰寂亂肆虐由政教不脩政教不脩由學校廢弛口口口口口口吏方袍縱掖口口露于外青青子衿挑闥城闕將孰之尤維是學廟爲浙河最始規于宋慶厯年職我

國初旣燬于口口今所存者至元間憲使陳祥重建也垂六七十載而就圯若此可不圖歟迺命口君職典教口口口口爲樽節廩口口計春秋二祀朔望香鐙師生稍給斥餘餽兵又餘則營繕脩於是材獻其良工展其口苦口成之

口外而臺門內而兩口口口口及池亭有廢聖像之餘配
享從祀之位凡屬在廟者載肅載容而無漫漶剝落蠹蝕

者矣

下缺

廬講肄之所口善庖湢之舍凡綴于學者靡不

疏剔朽腐易其舊而更其新也肇端於夏

下缺

完好口口

休口顧余筆槩荒落疇克發揮口問之學校有作政教繫

焉政教之掌司徒職焉

下缺

掌而施教者十有二以祀禮

教敬則民不苟以樂禮教和則民不乖陽禮教讓使民不

爭

下缺

安而民不越不偷教中以刑教恤以誓而民不讎

不怠至於度教節世事教能民知足而不口職口口制口

口庸制口口口口口德而興功凡此者皆以善教民而非

學校則無所施焉矧鄭爲禮義之邦文獻淵藪雖罹擾亂

而民不知兵行化者易於口口施而受教者樂於順嚮當
四方厭亂思治政偃武脩文之期孰謂作民極基太平而
不權輿於此乎上下感應捷於桴鼓一轉移間耳故推本
首陳有虞五教之說而終周禮法言爲告若有諄復於司
徒者不鄙余論則庶幾先王之教不墜口口之道彌彰而
上不負

天子倚注之隆下副士民好德之望矣豈維塗墍丹堊犧
尊青黃詞章句讀而於樂鼓鐘之末云乎哉謹記

至正二十一年十二月一日敎授連五雲學政劉鼎鄧珠
學錄胡克俊耆儒胡世佐孫正蒙賀口王壽朋迺賢楊彝
鄭覺民王淳孫張用庚蔣景武林元孔克樵黃庭趙崑蔣

光祖直學宋暄司吏方良玘阮口章等立石

右碑文二十九行正書在寧波府學此述平章政事
銀青方公脩學而徵記于仁本也按文君職典敘樽
節廩口計春秋二祀朔望香鑪師生稍給斥餘餽兵
又餘則營繕修斯時之財匱兵連可知矣仁本以平
章進爵司徒遂本周官十有二敎以立言所謂首陳
有虞五敎之說而終周禮法言爲告有體之言頗爲
切近銀青方公者方國珍也時已受朝命敎授連五
雲學政劉鼎鄧珠學錄吳克俊皆可補志乘之軼

元加封忠佑廟神碑

皇元加封忠佑廟神之碑

文林郎翰林 國史院檢閱官袁士元撰

中奉大夫浙東道宣慰使司都元帥兼海道都漕運萬戶倪可輔書并篆額

鄞城北出門數百舉武踰保豐碑有古廟額曰忠佑神曰
昌城侯歷世滋久揚靈 昭城西北內外連薨聚居之民
里社幾萬餘家歲時展事惟謹呂氏代爲廟史能歷紀其
績以及歷代褒封之典傳以迄今我

朝東南海漕達于

京師神之效靈尤彰奉

詔加封將刻石以揚神休廟史囑里人之知言者章叔明
列狀請記余領職翰林嘗附海舟知其靈口因不辭按狀

侯姓劉氏名植字伯先鉅鹿昌城人漢雲臺二十八將之
驍騎將軍也光武中興嘗渡潞水至鄧口牧奴家封鄧爲
牧奴縣事見太平寰宇記竊意光武草創之際越江漸海
雲臺貌虎之臣必有執羈勒以從者則劉侯之揚鑒茲土
蓋其生前所涉效功之所豈無事而倏至哉鄧卽鄴地鄴
因濱海之邦島嶼怙險作姦時或有之典午氏之東建武
初年寇犯郡城侯倏現旗纛雲霄中昭示雲臺將軍名號
寇疑懼而退由是威靈振揚郡上聞封東晉口口昌城號
賜廟額忠佑俾民社得以展事後隆安間台寇孫恩復駕
船千艘事抄掠侯仍現旗號如前寇方驚疑適大將軍劉
裕兵至攻却之繼而百粵烏尾船入寇劉牢之將兵至以

同門出祭禱于神卽奏功旋師其效靈於晉室而廟食者
以此由晉而降及于唐季神之靈異故有石刻紀績燬于
兵火廟史所書得其一二在劉宋則以劉姓犯國姓去卯
爲釗在錢鏐則以方言聲相近呼釗爲焦承訛襲謬無從
質究今亦不復識別而其神靈則猶一日也自侯廟所越
十里許爲慈谿縣境有驃騎將軍廟境人沙誠者負氣
抗直人以權禁誣之義不屈辱卽含怒立死於驃騎廟中
逮捕人至忽現相雲霄間恍惚聲呼曰我在此人咸驚異
因像設于驃騎廟神事之人或走叩靈應特甚遠近聞者
多迎致其神展奉於它祠我里大家白于官亦得像設于
侯廟東廡若從祀神由是里社有所有報或牲牢致祭祫

享無間洋洋如有以慰答人心之趣嚮廟之靈應愈加
顯聞宋宣和間封雲霄檢察使豈其神氣相爲感孚潛通
默會相資以聞神用人固莫測其所以然也入我
皇元神用尤彰舉其要者

國家建都于燕多賴東南海漕以資頒祿巨浸口口無畔
岸或長風駕浪滔天沃日之執智力所不能周惟倉卒叫
號神明賴以善濟近中原路梗守臣役善水之卒倚舟楫
爲通衢迺至正二十三年稠載之艦至鷄鳴山連日颶風
霧霧晦冥莫知向方漕臣棹夫同心叩禱神人徧現若自
天降豁然開霽如夜斯曉旣達于

京具辭

上聞加封昌城劉侯武烈公沙使協佑侯廟額如故漕臣
汪子美頌

命還鄞藩府俾礫牲致祭以慶褒嘉刻石以示將來余謂
武烈公事英靈瑰奇之氣于天生致侯封署勳雲臺沒而
爲神顧乃廟食于海濱三數千里舊涉之地厯千數百年
累更世主迺今加封進爵施及從類愈久彌彰致使粉榆
之民尊之若宗祔信之如誓龜雖歲時樂神之會儀從習
俗鼓鼙歌管之音聞于里巷一時間里之人相歡相屬和
輯於隣井之間使各安其生業子孫保之者公之惠不旣
多哉不但禦裁捍患之在祀典而已也因撫廟史之辭爲
記使刻諸石

至正二十四年歲在甲辰六月十八日朝列大夫海道都
奉 胡仲瑛刊

右碑篆額十字上列國書十行末有正書宣命二字
下列文正書三十三行在鄞縣按神之始末事績靈
異文已詳言之至云避劉宋國姓去卯爲釗在錢鏐
時以聲相近呼釗爲焦從古諱名不諱姓士元書此
亦疑以傳疑耶士元字彥章鄞人忠臣鏞之孫也自
幼嗜學郡守禮致爲五經師御史奧林薦授鄞學教
諭調西湖書院山長叅政允素薦爲平江路儒學教
授道梗未上又用薦陞授文林郎國史院檢閱官引
年弗就晚號菊村學者廟有二一在府西北一在府

西南名劉端公廟

元杭州路重建廟學碑

杭州路重建廟學記

翰林待制奉政大夫兼國史院編修官孟昉撰
承事郎江潮等處行樞密院經歷林鏞書

榮祿大夫江浙行宣政院使廉惠山海牙篆額

至正辛丑冬十一月宣聖廟火學官齋舍罄爲焦土江潮
省丞相達識貼睦邇平章張士信大懼教弛乃召郡侯夏
思忠曰二帝三王之盛命契爲司徒敷五教周建辟雍繼
世迄今君天下者相承不墜所以明人倫厚風俗培植後
進爲它日治平之用其來尙矣又朝廷以六事課守令殿

最學校居先庸可緩乎侯曰斯牧伯之職也丞相首出白金爲兩五十錢以錠計若干平章給米以石計若干太守割俸金鄉義發私藏皆樂爲佐役費雖一木一瓦不徵諸民於是躬率羣僚口卜穀旦鳩力僦功荷畚鍤輦灰燼導材于河伐石于山趣梓人據式圖其製匠師執尋度其用廣袤合度脩短適宜斤者斲刃者削巧者施其巧力者輸其力拓垣墁以宏其基積土石以隆其址禮殿歸峙衡爲間五縱如之而差淺夾室廡序合應門爲間五十有七飾以金碧錯以丹堊闌檻旁午陞戟森豎廟貌端肅儼若在上采服施彰悉遵儀制從祀諸賢世次位列百一十九人衛以朱纁門之南東西相向各構室四楹爲三獻監禮官

幕次又少南爲門二楹題曰泮宮門之衝鑿泮瀦水若玦跨石梁于上以便往來又少南爲朱門三表王儀也廟之東爲神厨其楹四西爲明倫堂計間七廈如堂數軒少堂之四設講席以嚴師道左右齋儀門及別門爲間三十有九堂之北構重屋三楹爲貯書所敎授有廨正錄有居貢莊有粟師生有餼庖廩庫一無所缺尊壘爵洗簠簋俎豆之屬二千百有九鏞球琴瑟祝敎鼗鼓之屬若干皆如禮以定其數新禮生樂工服若干襲提編氓籍戶爲樂二十有八括其所費米石錢緡日工皆以萬餘計經始壬寅冬越癸卯秋就緒於戲是蹟也始以兩相孜孜興學之善終以賢侯臺臺究心之勤副以僚屬循循毗贊之力俾四

代之制翦焉一新其雄偉壯麗甲東南爲傑觀者可謂知爲政之先務無媿德于他郡矣抑嘗惟之時有理亂事有難易杭爲故宋行在所當承平之殷民庶物阜有志於斯者尙慮不易矧橫罹兵燹之餘師旅未戢彼圖功利於一時惜治體而瑣瑣者方視爲不切苟非才大夫之有能有爲知教道結人心之不淺者顧能先樂育菁莪之地躋髦士于成德達才之域哉君子是以知夏侯之優于爲治也予姑敘興造顛末之實刻諸珉告後來者之無壞至于贊夫子之道則凜乎先儒愚惑之誅故不敢輕言以及時董工持總者杭州路治中李脫歡奉直知事韓元璧照磨姚翥郡史陸巽朱珍督役者杭州路推官丁鉞經歷劉良臣

嘉興路知事張昇將仕郡史梅君理受記材料者東北隅
典史鍾德王敬知肖聖像者諸暨州知州齊雲漢奉訓郡
史徐元璧皆與有勞焉同任勞者教授別貼達理月沙學
政姜讓直吏孫復可陳榮祖張元英 至正二十四年口
月 日杭州路達魯花赤怯烈失亞按攤不花承德薛爾
吉思杭州路總管高禮亞中陳忠奉議同知梅英治中樊
玉奉議立石 郡人徐孟賢鐫

右在杭州府學正書二十七行行五十字字徑一寸
篆額此述丞相達識貼睦邇張士信暨郡侯夏思忠
修學經始于壬寅冬越癸卯秋不周歲而成也碑後
有肖聖像者諸暨州知州齊雲漢不知爲畫爲塑諸

暨稱州元史元貞元年升爲州又見地理志是碑列
銜最多見于舊志者達魯花赤怯烈失按攤不花攤
字誤作擲薛爾吉思凡三人其餘自行宣政院使廉
惠山海牙樞密院經歷林鏞杭州路治中李脫歡知
事韓元璧照磨姚翥推官丁鉞經歷劉良臣嘉興路
知事張昇典史鍾德王敬知知諸暨州齊雲漢教授
別貼達理月沙學正姜讓杭州路總管高禮亞中陳
忠同知梅英治中樊玉等十七人並可補舊志之闕

元銅漏壺銘

天池壺

受水壺

江浙行樞密院分治上虞新城至正乙巳夏五月戊午日
乃鑄刻漏謹晨昏之節以時號令器雖微而政之所關則
大矣宜有銘以志作之所始銘曰

立表下漏軍府之經昭示大信無爽晦明天運有恆川流
不息盈虛升降茲器惟則人衆耳目視時興居小大奉行
以無或渝匪器弗渝惟出於公施政若斯孰敢不從江浙
儒學副提舉楊彝撰并書慶元路儒學錄臧居敬製

上虞縣尹王芳

都事朱元章

斷事官王若毅 龍霖 陰子恭

經歷鄭玠 毛冰伯 帖穆爾

同簽樞密院事張子元

樞密院副使張啓源 方冰

知樞密院事方國珉 徐仲裕刻

右銅漏壺在上虞縣庫中篆書二十一行行十三字
文首書江浙行樞密院分治上虞新城按元史百官
志行樞密院有征伐之事則置大征伐則止曰行院
爲一方一事而設則稱某處行樞密事已則罷至元
三年伯顏奏准江浙置行樞密院以鎮遏好亂之民
四年罷至正十六年置江浙行樞密院于杭州是時
方國珍反覆觀望據有溫台慶元等路以曹娥江爲
界此分治上虞新城之由也國珍前已授江浙行省

平章政事乙巳爲二十五年又進淮南行省左丞相
此國珉知樞密院時二十六年又進封衛國公而弟
國珉及子明善皆平章政事矣都事斷事經歷皆院
中屬官也楊彝錢塘人登進士第官至翰林學士以
詩古文重臺閣上篆隸真楷爲張雨所服磨讀此銘
與書洵不誣也明楊升菴謂楊氏有兩族于雲之楊
從手不從木此書楊從手楊桓書姓亦從手知升菴
之說有自來也縣尹王芳舊志云黃巖人

元昭貺神廟碑

昭貺神廟記

鄉貢進士戰惟肅譔金華吳肅書吳興趙奕篆

海爲百谷之王其支流而別出者曰江江之大而有名者曰浙浙江神最靈而異者曰昭貺廟廟之神曰司封按司封姓張名夏字伯起雍邱人也宋太宗朝舉進士第真宗朝官至兩浙轉運使五代時吳越王鏐築捍海石塘以廣杭州城由是富庶爲東南冠歲久崩圯郡民弗安司封患之於是躬禱于神神畀之休迺增築石塘層之高者十有二子塘之高者倍是塘之袤丈四千六百四十有奇朝以有功于民授司封郎中卒于官遂曰張司封云天聖間潮水汎濫石塘幾壞轉運使田公知府楊公率僚吏耆老等祠公于堤上水患旣平朝命贈太常少卿封寧江侯時慶厯年也大觀改元高句麗人貢顯神異封安濟公賜額昭

既高宗南渡信安郡王孟忠厚奏以靈駕護渡顯應加封
靈感安濟順應公進封靈濟顯佑威烈昭順王理宗淳祐
更昭順爲孚惠尋改孚惠爲廣利度宗易廣利爲安順遂
定王號□□尊稱初吳越築海塘□錢塘一國垂不朽之
功故其成之也若易繼其績能以一心興百世之利故就
之也似難蓋公之精誠通于天故公之利澤顯于時生而
爲人歿而爲神美爵徽號超今冠古不亦宜乎廟有石□
既毀錢塘縣尹仇有進□□□□□□□□□□□□□□
□以誌竊惟禮典有法施于民者則祀之能禦大菑捍□
患者則祀之今公之功□□□□□□□□□□者□□千古
□曰不然余辭不獲既序其事復作樂神詩俾邦人歌□

祀公其辭曰□之水兮安□爲民□□神休□□兮
□列庶羞靈鑒假兮神其我□江之水兮安止民渡中流
兮擊楫以駛□□□□天地終始□□□兮□人口
只馳素車兮胥之來駕蒼虬兮神之偕神母遠遊兮降福
孔皆綿百禩兮□□□至正二十五年七月吉日

杭州錢塘縣尹仇有進立石

右在三郎廟下正書十七行行四十二字無額已失
之也咸淳臨安志謂故司封郎中張夏祠四朝聞見
錄杭州江岸率多薪土衝擊輒壞夏令作石堤一十
二里杭人德之慶厯中立廟于堤上嘉祐十年又因
功贈太常少卿政和二年封寧江侯改封安濟公賜

額曰昭貺紹興十四年贈靈感三十年增順濟尋加
爵靈濟顯祐威烈昭順王

國朝雍正三年

敕封靜安公春秋致祭七脩類藁云夏字伯起雍邱人太
宗朝進士仁宗景祐中出爲兩浙運司正史作兵部
郎由前爲兵部郎也舊碑作張太常由後嘉祐贈爲
太常少卿也宋祀典作工部夏員外訛也俗呼司封
以其有功授司封郎中也其稱謂不同如此

元鄞縣重修儒學碑

鄞縣重修儒學記

亞中大夫江西湖東道肅政廉訪副使郡人程徐撰

將仕佐郎江浙等處儒學副提舉制河楊彝書

朝散大夫前僉江西湖東道肅政廉訪司事豫章揭汝篆

鄴尹宋侯作邑之二年大脩縣庠

孔子廟旣成邑士權欣咨嗟謂侯崇迪教化嘉惠斯文甚厚弗刻石罔憲于後祀迺奉教諭柴浩氏所狀謁文紀成績案鄴學重建當延祐改元後泰定二年至正九年凡再脩屬時多虞復廢棟圯梁壞榱桷折肖像漶剝無以妥神靈嚴祀事觀視湯藝講肄弗稱侯以二十三年蒞職首詣學謁廟顧瞻歎息曰令忝宣化非吾責耶然供億繁重舉墜未皇明年政洽民知嚮慕會郡監守咸尙儒術侯遂

稟命捐己奉爲倡好義者相率助貲伐木于山埏埴于陶
屬東昌胥恭誠董役而俟日至督之脩大成殿兩廡易朽
扶傾葺飾舛落改埽先賢像而廟完矣脩明倫堂三間東
西齋各四間爲諸生肄業所拊會文堂于東偏爲教諭居
雙檜堂于西偏爲訓導齋屋皆如堂數而學官具矣外復
靈星門傍爲別門繚以周垣甃以甃石置庾于會文堂側
前植松檜卉竹後列庖湑溷廁益造祭器嚴正簿籍悉圖
永久禮明師訓生徒弦誦不輟課試有程而教養之方亦
略備矣始事於二十四年六月訖工於二十六年二月凡
攻木之工若干日攻埴之工若干日助力之工若干日先
是徙縣治學西隸學地一畝二十三步爲縣園址侯卽別

置田四畝五十五步以貿之歲入米得石有三斗奇歸于學云於乎人生受天地之衷而不能無欲敎也者節其欲而復乎衷也欲節則隱日脩善日生而衷復矣然非上之人倡焉而興起之聳其觀嚴其式導其趨習作其氣志則敎有所不行焉此廟像學校所繇立也或迺視爲虛文漫不加省而徒威力是恃則過矣宋侯當繹騷之時克承上意惓惓以興學爲務不資廩入不勞民力而廟廷黌序煥然一新又能備敎養之實以隆風化之本異時人心丕變有恥且格賢才輩出光輔中興之運寧不基於此乎使今之爲守令者皆能如侯事事風俗其有不古復者乎匪獨鄴邑之幸而已也故書以爲脩學記侯名禮字和卿東

平人是年春二月朔記

敎諭柴浩主奉孔克全學賓陸景龍楊九法薛憲臧永胡
璉陸源遠鄭元祥吳宗周邑士劉希賢楊忠余克勤崔植
耆儒陳李江黃可大費用中戎彝學吏陳恆立石

郡人張通甫刊

右碑篆額八字文正書二十六行在鄞縣學此述鄞
尹宋禮修學事始于至正二十四年訖工于二十六
年凡兩歷寒暑其不敗于垂成者幸也蓋當繹騷之
時國事已不可爲劬勩蒞事徐文所謂中興之運不
基于此者亦慨乎其言之矣揭泮字伯防豐城人學
士溪斯之子以廕補秘書郎遷國史編修官至肅政

廉訪司事改江西行省以工部郎中召時淮浙亂道
不通畱家慈谿築此碑也教諭之下又有主奉一人
學賓九人亦他碑所未見洪筠軒云銅壺漏銘楊彝
此作楊彝从手从木蓋通借字明詩綜楊彝字宗彝
餘姚人洪武中以人才舉爲沔陽倉副使以獻詩擢
吏部考功主事此結銜疑是方氏所授官也

元稽山門甕城開路碑

越自古爲名郡東瀕江海南通衢婺兵甲薦興獨爲
之地由我

國家公卿大臣善于撫守若

司徒隴西公 兵按治不動聲色而 境晏然民安如堵

下缺
危乃命樞密同僉周公

公浙省員外郎

口城池

下缺

月之有弗備者復增治之由是指揮于君董

其工而君尤能广

下缺

戰守之地故東南要衝鎮越之門

建弔橋以便

馬之出入浚

下缺

棹之往來更樓

空石

岸如削周圍堅固內外崇

不

下缺

於民力始于至

正二十六年之二月訖工於

下缺

勢煥然嗟夫城池之堅

深非難

之爲

之

下缺

難今我

司徒隴西公

既得民心尤

下缺

民圖治之澤當傳之無窮與斯城同爲

不朽指揮于尹

下缺

彥良金珎立石

右碑文正書十二行在山陰縣稽山門外前後漫漶

不辨有兵甲薦興及司徒隴西公領兵按治云云按是時承方國珍之擾明太祖已有數郡司徒隴西公能克勤完緝是可記也惜剝落不知其名

元清風嶺王烈婦祠碑

王婦者夫家臨海人至元十三年

王師南 王婦夫舅姑俱被執師中千夫將見王美麗乃盡殺其舅姑與夫而欲私之王婦憤痛卽自殺千夫奪輓不得死責倖囚婦人襍守之婦欲死不得聞自念當被汙卽詐曰若殺我舅姑與夫而求私我所爲妻妾我者欲我終善事主君也我舅姑與夫死而我不爲之哀是不天也不天君焉用我爲願請爲服期月苟不聽我我終死爾不

能爲若妻也千夫畏其不難死許之然痛益置守明年春
師還挈行至剡水上守者信之滋益慙過上清風嶺婦仰
天竊歎曰我知所以死矣乃齧拇指出血寫口占詩山石
上已南鄉望哭自投崖下已死或視血則血漬入石間盡
已化爲石而且陰雨復見血漬起如始日當是時后妃嬪
媛不死之三公九卿不死之郡國守邊大吏不盡死之而
貞婦獨守死下從舅姑與夫獨何仁也夫人秉彝之性靡
不有乃匹夫匹婦出之遂以驚動萬世苟人人慮此則金
湯不足論其固矣鉤戟不足論其強矣志士仁人不足論
其知矣何有去國僨家之憂彼貞婦何爲者顧奮爲烈士
夫之所不必爲唉宜爲而不爲悲夫至治間其邑丞徐

端爲起石祠樹碑祠中以旌其魂焉余曰始我見長老言
貞婦所從死不能悲也後身過其地見拇血化爲石追念
貞婦決死時旁皇悲傷不能去豈其魂未泯尙猶感人邪
嗟乎匹夫匹婦顛沛流離誠能動天如此夫天豈遠人哉
夫天豈遠人哉永嘉李孝光記亞中大夫紹興路總管兼
管內勸農事泰不華書四明王永仁刻

碑陰

兼善侍郎遷紹興總管諸公分題作詩餞行得清風嶺乃
爲賦清風篇康里巉

清風嶺頭清風起佳人昔日沉江水一身義重鴻毛輕芳
名千載清風裏會稽太守士林英金榜當年第一名一郡

疲民應有望定將實惠及蒼生

右碑在紹興府學明倫堂篆書十九行字徑一寸碑
爲永嘉李孝光撰泰不華書所叙節婦王氏題崖石
詩詩已見前碑李孝光字季和少博學篤志隱居教
授泰不華常師事之至正七年詔徵隱士以秘書監
著作郎應召赴京進孝經圖說明年升文林郎秘書
監丞卒於官居雁宕山五峯下自號五峯狂客所著
詩文曰五峯集見元詩選不華字兼善伯牙吾台氏
初名達普化及第後文宗爲易今名至正元年除紹
興路總管此碑未署年月追刻於至正間也史稱其
善篆隸溫潤遒勁此則學石鼓文而稍變其法者碑

同治金石記卷十八
陰刻康里巉清風篇一首草書十五行徑寸餘巉字
子山號正齋康里氏官翰林學士承旨此詩筆致清
逸書尤瘦勁絕倫山居新話載其與楊瑀論書曰余
一日寫三萬字未嘗輟筆可見其造詣深矣

元薩都刺游紫陽洞詩

題紫陽勝境 元肅政廉訪司知事雁門薩都刺天錫
天風吹我登鼇峯大山小山石璫璫赤霞日射紫瑤白
露夜滴青芙蓉飄飄雲氣穿石屋石上涼風吹紫竹掛冠
何日賦歸來煮石篝鐙洞中宿

右在紫陽山摩崖行書五行字徑三寸按兩浙名賢
錄薩都刺字天錫雁門人寓居武林博雅工詩文而

性好游興至則發爲詩歌以品題之西湖十景詞尤
贈炙人口元詩選傳天錫陟官閭寧往還吳越此詩
題元字疑非原刻也

元貫雲石等通元觀詩刻

贈法師俞行簡詩 貫雲石 遁跡復逃形丹成養性靈

精誠動神鬼呵叱走風霆鶴去鸞輪駛龍歸雨氣腥送師
歌短曲涼吹滿江亭 虞集 僊壇遙接上真宮楚越閩

洋一望中南北高峯雲杳靄東西天目雨溟濛經綸旋動
仙音作樓閣縈迴複道通雲鶴仙人無定跡鸞輪時輾望
三峯 張翥 羽蓋翩翩下九重江鄉秋晚滯仙蹤信傳
真府憑青鳥劍舞瑤壇走碧龍頃刻風雲興五嶽須臾雨

澤慰三農殷勤欲問叅同契靈鳥遄飛未易從

右在吳山通元觀摩崖行書十一行字徑一寸按貫雲石兩湖塵談云阿里海涯之孫父名貫只哥因以貫爲氏小雲石酸齋其號也有文武材折節讀書士大夫樂從之游少用父蔭爲萬戶府達魯花赤讓與弟以文行薦爲翰林侍講學士知制誥旣又辭疾還江南詭姓名易服色賣藥錢塘市中七脩類稿云北山棲雲菴其藏修之所也

元楊遵理公巖題字

理公巖 口口楊遵書

右在射旭洞內摩崖篆書橫列字徑八寸欵字正書

字徑一寸按書史會要楊遵字宗道浦城人徙居錢塘篆隸皆師杜待制續宏簡錄云字宗正元至正間人也

元玉林帖木兒題名

江陰州判官玉林帖木兒重裝

右在飛來峯摩崖正書二行字徑二寸按元史百官志至元二十年定爲上中下州俱有判官

元張與材重陽菴題字

十方大重陽菴

正書二行字徑一尺

大素口口廣大真人管領江南

諸路道教嗣漢三十八代天師張口口書額

正書欸在左

吳山

福地

正書字徑六寸

齊公後人黃中氏洛陽宰遜口施財刻石摩

崖紀勝

正書款
在右

青衣洞天

正書字
逕六寸

全真派下口口口口

山口口口張口材建立

正書款
在左

右在吳山重陽菴摩崖按菴始唐開成間韓道古結

茅以居元大德間西川道士冉無爲重建道書天一

爲陽而清又爲陽故曰重陽天師廣微子張與材爲

題字云元史釋老傳元貞元年與材嗣爲三十八代

襲掌道政時潮嚙鹽官海鹽兩州與材以術治之遂

息此卽其題字時也晝髓元詮與材字國梁號薇山

別號廣微子封畱國公

元太玉洞題字

容成太玉洞天

右刻在温州府城東華蓋山摩崖正書字徑七寸餘
按道書爲天下第十八洞天黃帝時容成子上昇處
延祐時曹淵新建容成道院扁曰太玉洞天明王光
蘊容成道院記謂宋仁宗嘗夢游太玉數遣使降香
幣元提點曹君構容成道院以居全真之士此題應
卽其時所刊朱竹垞有詩詠之

三生石

篆書

太玉洞敎主長谿含真子張大光印證

隸書在上字左下

中書舍人柳楷重模

正書在上字之右

右刻同上無年月按萬厯温州府志容成太玉洞有
石龜池青牛塢三生石丹井蒙泉諸勝王光蘊記亦

云舊有青牛谷五粒松三生石惜蕪沒不可復識不知當時刻字猶存也

兩浙金石志卷十八

廣州府糧捕通判新昌梁 輯刊

臨海洪瞻墉校

兩浙金石志補遺

此志刻成後吳荷屋方伯

榮光

由黔寄至會稽新獲建

初摩厓地券福又檢家中舊藏及同人所贈並作補遺
附於後隨得隨刊其先後或不能盡依世次云道光四
年秋揚州阮福識

漢建初摩厓大吉石刻

大吉

此二字在上方

昆弟六人共買山地建初元年廷此冢地直三萬錢

右刻在會稽縣之



山隸書凡五行行四字上方

有大吉二字以建初尺度之字大六寸五分及二寸
五分不等近年始爲山陰杜氏所獲蓋當時買地券

文也廷是造字省口冡是冢字俗傳大吉二字爲錢
武肅王微時販鹽遇官兵跳避題於石壁據此則其
說誤也

晉太康前

大男楊紹從土公買冢地一丘東極闕澤西極黃滕南極
山背北極於湖直錢四百萬卽日交畢日月爲證四時爲
任

太康五年九月廿九日對共破前民有私約如律令

右前長五寸廣三寸八分文六行文六十五行書狀
如破竹以錐畫沙成文然後陶瓦爲之金石錄補云
萬歷初會稽倪光簡冢地內掘得太康間冢中杯及

瓦券柳元穀以是物易徐文長畫亦見徐文長詩集
誤任作伍廿九日誤作廿五破蒯誤作破蒯蒯說文
無此字當爲別卽周禮小宰職傳別之別鄭注傳別
故書作傳辨予謂辨與別聲之轉其義一也又曰傳
別謂爲大手書於一札中字別之孔疏云謂爲大手
書於一札中字別之者謂於券背上大作一手書札
字中央破之爲二段別之據此則別若今人合同文
字矣蓋當時別以竹爲之後世易之以瓦而其形似
竹也故字從竹隸書从竹之字多从艸遂與種穰移
蒔之蒯相混耳至乾隆年間爲山陰童鉉所有世傳
墨本皆鉉所拓也

晉保母磚

郎耶王獻之保母姓李名意如廣漢人也在母家志行高
秀歸王氏柔順恭勲善屬文能草書解釋老旨趣年七十
興寧三年歲在乙丑二月六日無疾而終仲冬既塋塋會
稽山陰之黃閉岡下殉以曲水小硯交螭方壺樹雙松於
墓上立貞石而志之悲夫後八百餘載知獻之保母宮于
茲土者尙□□焉

右甌長一尺一寸廣一尺一寸十二行行二十字行
書宋會稽太守豫章李大性跋嘉泰二年夏六月山
陰農人闢土得磚於黃閉岡卽是碑也時有曲水小
研俱出焉色黝而潤後有晉獻之三字旁有永和二

字以志文觀之蓋殉葬時物也碑字十行斷缺之餘
其文可讀今歸錢清王畿字千里好文博古乃三槐
文正之後得所歸矣碑云後八百餘載知獻之保母
宮於茲上墓輒之出實八百三十八年獻之前知如
此異哉考是碑本斷爲四歸王畿後又斷爲五當時
有疑爲僞者姜堯章夔作十跋力辨之遂見重於世
至 國朝白石所跋之本歸徐尙書乾學今見於類
帖亦有專刻不知何時重摹也

宋故處士張君墓誌銘

左廸功郎新桂陽軍軍學教授陸九齡撰

右廸功郎新紹興府上虞縣尉沈煥書

右廸功郎知婺州浦江縣事趙帥立

婺之東陽處士張君諱謙字叔仲乾道三年冬予口會稽君遣其子至四明因鄉友沈口以書來請使其三子受經焉予謂曰九齡學古道不能爲場屋蜚聲世所謂逸民者豈有意於用世耶煥曰彼之有請於先生正欲使諸子以正心誠意之學由近及遠自明至著必先以大學中庸爲主馴至修齊治平之業當於是乎取焉以故知君非流俗人也九齡伏膺口誨遂爲諸子日事進修默坐拱聽似有得者自恨相見之晚四年秋七月之望復自會稽還江西公復以三子付托終業嗚呼予與公自幼相得君之子若德以明經貢入上庠諸子又皆德業克備可進於善予思

知愛之深今諸子有成豈非君趨庭之訓有自抑予啟迪
之有功也予不得而知也越明年春君遂捐館訃聞君之
子若德奉弊走數百里泣血言曰先君受知大君子不幸
棄世墓銘尙缺苟非先生大手筆曷足以闡潛德發幽光
予痛不自勝遂收涕直述其事君諱謙字叔仲其先由汴
梁東平壽張始祖潮爲口寧令遂占籍焉七世祖公澤力
學砥行累徵不起賜號冲素處士曾祖定祖佑父烜俱有
隱德不仕兄叔恩爲大理評事歷世綿延代有顯人至君
砥礪名節不自進取韜光泉石妻厲氏修行婦道甚得內
助子男五若德明德崇德順德仁德俱從九齡與延平李
先生學女三人長適邑人陳原次未行孫男六尙幼處士

生於政和乙未三月庚申享年五十有五卒於乾道己丑九月辛亥其孤奉柩殯于乘驄鄉槐楓里作塘塢祖塋之傍銘曰

君子伊何惟善是趨口人伊何名利是違惟仁與義俗之所棄惟勤與儉俗之所趨俗則遂之公則愚之俗則棄之而公志之莫不訓子公訓則殊訓子受經乃病潤迂人臻于戚公則撫之尙其嗣之克紹君志

右碑在金華府東陽縣文及題銜凡二十四行每行三十四字宋陸九齡撰正書銜云左廸功郎新桂陽軍軍學教授按宋史陸九齡傳云九齡登乾道五年進士第調桂陽軍教授以親老道遠改興國軍此碑

卽作於乾道五年故云新桂陽軍也沈煥字叔晦定海人宋史有傳史稱與九齡爲友從而學焉同舉進士授餘姚尉按碑銜作上虞縣尉足以證史傳之誤

宋婺州東陽縣昭福院殿記

左承奉郎新沆權通判湖州軍州主管學事賈庭佐撰
左奉議郎權吏部侍郎邊知白書

右朝奉大夫權刑部尙書兼詳定一司勅令周三畏書
額

昭福院創於唐僖宗之廣明元年庚子歲迄今宣和辛丑凡二百四十一年以魔寇火無有存者後八年歲在戊申院之僧可詵募率信人以建佛殿旣而復造釋迦及文

殊普賢等像誥之披攘經營積累錙銖俯仰於此十有五
年以及其志之成而來乞予文以爲記予謂毗盧遮那徧
一切處巍巍堂堂煒煒煌煌聲前非聲色後非色今以土
木之工像設之嚴欲求如來茫如搏風捕影竟何所得又
況人人身中有如來相結加趺坐儼然不動如石中金如
木中火如琴中聲如井中泉如雲中日湛然具足無欠無
餘何假外求弟以衆生從無量劫來無明覆蔽不能覺照
沉迷三界譬如真金墮不淨處隱沒不見卒難語以無漏
聖道示佛知見是故由事入理須假建立蘭若崇飾梵容
使之觀相生善皆爲最上一乘若百川衆流究竟朝宗于
海然則誥之爲是役也不枉矣故爲記之不獨著其成亦

因以明如來之爲人切也紹興十七年三月十五日記

右碑在金華府東陽縣文及題銜凡十七行每行三十二字宋賈廷佐撰正書額題勅昭福院釋伽殿記篆書碑云今宣和辛丑以魔寇火無有存者卽宋史本紀所云宣和三年春方臘陷婺州也按東陽唐宋時並屬婺州唐武后分義烏縣地所置廷佐字子野真定人宣和二年入太學隨父淵扈蹕南渡遂家東陽登紹興二年進士授桐廬簿時金遣張通古偕王倫南來以詔諭江南爲名廷佐一再上書累千餘言論讐耻之不可忘名分之不可貶和約之不可信請誅王倫以圖恢復可謂剛毅而有節者三畏紹興

同治金不元利通
十九年由右朝奉大夫知婺州軍事碑額先二年所
篆後避秦檜卜居蘭谿忠隱菴亦可謂卓爾不羣者
矣

宋厲山夏厲記

一山峩然去縣四十五里曰夏山大禹至是而得名上有
龍宅焉由來遠矣唐貞觀間刺史厲公文才卜居山之西
衣冠甚盛惠澤一方時人敬慕遂以山之名合厲之姓名
夏厲孫玄仕至侍御史號其鄉曰乘驄里曰御史雅好山
水中興灌頂兩剎皆別業也又於宅之東隅開渠千餘丈
引溪流灌漑田伯餘頃號都督堰爲利甚廣民到于今受
其賜子孫環居不墜箕裘之緒可謂源深而流長也故刻

石以明其本云宋淳祐改元歲在辛丑冬至日中奉大夫
秘閣修撰鴈模誌

右碑文凡十七行每行十一字宋鴈模撰正書在今
金華府東陽縣按文才唐太宗貞觀間進士其孫元
文宗太和間進士文才爲道州刺史是時南土未靖
荔浦之寇猖獗掠境文才臨郡期月羣盜悉平改容
州刺史未幾辭歸灌頂寺舊名甘泉文才捨宅所建
也大中祥符元年改今名都督堰在乘驄鄉俗名社
陂亦文才所創緣文才嘗爲都督民感其惠卽以其
官名之也

元東陽縣東嶽乾元宮興造記

泰山魯之望也天下宜不得越望而祀焉然而郡邑通得
廟象泰山之神者之祀典而若衡華恒嵩通謂之嶽者曾
不得以儷其尊何也豈非沿古封禪有泰山社首之文以
爲帝王之符瑞民物之生殖胥此焉出則夫仰瞻雲膚如
登日觀望而祀之雖之乎數千里之外可也夫豈得以越
望而限之哉東陽爲婺州屬縣廟在縣西二里宋紹興中
縣人太常博士中書門下省口正諸房公事口公冠嘗一
新之下迨至元中口口口口又完葺之於是卽廟爲乾元
宮而以祠祝之事付之老氏之徒且創私田口五十畝資
其膳食歷歲滋久廟之日久於壞有自米矣迺至順三年
縣尹承德郎許侯思忠蒞政之明年也秋則不雨又齋沐

禱廟下翼日遂雨顧瞻神栖口焉將壓侯進父老而諗之
曰事神治民令之責也不圖厥新咎則誰諉衆曰侯無私
福敢不唯命且請以義民徐載孫任珙等敦匠事侯既捐
俸倡首而民咸勸趨輸材致粟如恐或後起手於明年閏
三月壬寅粵五月巳酉工告訖功殿寢言言軒陞仡仡門
闕崇崇庭廡殖殖丹塗白盛煥采如流搏像設色冕黻應
度諸凡廟制之宜有無外求者會

新天子初正

宸極

詔修嶽瀆之祀侯廼率縣之長貳僚吏欽承

德意潔饗薦盥祝嘏正辭神用顧歆野夫林叟感悅蹈舞

謂侯以明信誠和神庥神以貺施丕稱侯德宜有篆刻顯
識牲石口予舅氏實以其文命貫貫曰書稱柴望岱以宗
尊則泰山固爲郡嶽之統百神之主矣矧而地載神氣凝
爲山嶽氣無所不至故神無所不周厥令

眞元會合九域大同聲教所漸暨于四表東陽南泰岱不
數千里而近雲霞之布濩風霆之流行明者動變初無方
體神而明之在人而不在物肆廟貌之增隆迓嶽靈之來
假而

溫詔自天秩茲殷禮藐焉方百里縣巖巖表脅之瞻是亦
龜蒙常許而已雖不必徵之繩金檢玉之書而歸美報
上之實已與天保之雅並傳而無間矣侯以世澤八官三

石云大□□年歲次壬寅十月二日□持寶林禪寺佛日
正覺慈智廣行禪師□心撰

當寺弘教慈明惠□大師□道存書□寺□老比丘祖心
立石

右碑在金華府東陽縣文及題銜凡十四行每行四
十五字草書據明一統志寺建於唐咸通間文有剝
落如云大□□年歲次壬寅按大德乃元成宗年號
壬寅則大德六年也

續蘭亭會詩序

第一層

續蘭亭會

篆額四字橫書

畫作崇山陂陀竹樹之景正中層樓當爲州衙不署名
後則爲高風閣右則爲龍泉寺左則爲雩詠亭亭前有
方池引爲曲水卽序所稱瀦爲方沼疏爲流泉者也

第二層

續蘭亭詩序

東晉山陰蘭亭之會蔚然文物衣冠之盛儀表後世使人
景慕不忘也當時在會者瑯琊王友謝安而下凡四十二
人臨流觴詠從容文字之娛而王右軍墨蹟傳譽無盡豈
有異哉蓋寓形宇內卽其平居有自然之樂者天理流行
人與物共而各得其所也昔曾點遊孔門曾次直與天地
萬物上下同流故其言志以暮春春服旣成童冠浴沂舞

零詠歸有聖人氣象仲尼與之垂八百年而有晉之風流
蓋本諸此自是而莫繼焉後唐宋雖爲會於曲江率皆矜
麗務爲遊觀曾不足以語此者余有是志久矣適以至正
庚子春治師會稽之餘姚州與山陰鄰壤望故迹之丘墟
而重爲慨嘆於是相龍泉之左麓州署之後山得神禹秘
圖之處水出巖罅潄爲方沼疏爲流泉卉木叢茂行列紫
葢間以篁竹彷彿平蘭亭景狀因作零詠亭以表之維時
天氣清淑東風扇和日景明麗實三月初吉也合甌越來
會之士或以官而居或以兵而戍與夫避地而僑暨遊方
之外者若樞密都事謝理元帥方永鄒陽朱右天台僧白
雲以下得四十二人同脩稷事焉著單袷之衣浮羽觴于

曲水或飲或酢或詠或歌徜徉容與咸適性情之正而無
舍己爲人之意仍按圖取晉人所詠詩率兩篇若闕一而
不足者若兩篇皆不就者第各占其次補之總若干首目
曰續蘭亭會殊有得也嗟乎自永和至今上下宇宙間千
有八載遺風絕響而今得與士友俯仰盤桓追陳迹脩墜
典講俎豆於干戈之際察鳶魚於天淵之表樂且衍衍夫
豈偶然也是雖未能繼志曾點然視晉人則亦庶幾已矣
獨未知後之人又能有感於斯否乎會人請紀以冠詩端
而諸姓名則各因詩以附見如左是日江浙行省郎中天
台劉仁本敘并書江浙行樞密院都事同郡謝理篆蓋
四明胡仲瑛刻

第三層

補四言五言詩各一首凡一十六人

郎中劉仁本補參軍劉密

俛仰宇宙睠茲山川欣欣卉木泠泠流泉豈伊獨樂尚友
千年飛觴拊詠萬化陶然

陽春沐膏澤草木生微暄靈圖發幽祕感此禹跡存衣冠
繼芳集臨流引清尊性情聊自適理亂復奚言

都事謝理補侍郎謝瑰

瞻彼阿丘神禹祕之茂蔭嘉樹清泛芳池臨流引觴衍衍
以嬉俛仰千古逝者如斯

春溫散晴旭灌木浮嘉陰良辰事脩禊我友欣盍簪方池

注清流可以濯煩襟一觴復一詠暢情忘古今

鄉貢進士趙倣補參軍孔熾

青陽旣殷以遨以遊采蘭崇阿濯纓芳流翰藻載詠羽觴
載浮潔我禊事于以寫憂

暄風播廣宇欣懷託陽春盥袂寄幽暢虛襟遺世塵擷芳
遵丘阿接杯沿澗濱詠歸何逍遙遐哉仰斯人

天台僧悅白雲補任城呂系

疇昔有懷陰雨翳霄兀爾居室忽焉終朝際此晴煥散豁
林郊潛鱗泳波遊羽鳴條

崇阿撫神祕微風扇和淳靈雨旣云沐品彙區以陳蘭若
擢中沚葩萼媚芳晨散懷得真契引觴答熙春

前蕭山主簿朱右補餘杭令謝藤

陟彼崇阿遊目遙岑川雲凌岫林木蔽陰喈喈黃鳥懷之
好音亦有良朋載嘯載吟

息徒坐蘭階臨流濯清泉光風被林薄春服麗以鮮持觴
撫流景薦魚樂天淵俛仰同一慨弱毫從所宣

前帥府都事王霖補王獻之

滴彼源泉其流泱泱誰其透之以詠以觴酌此春酒以被
不祥

華髮宴餘春微風宿雲散蘭皋野氣芳桐岡日初旦羣賢
集掌丘臨流水光煥酌酒清湍曲俯景慨長歎

第四層

蕭山教諭朱炯補府功曹勞夷

俯挹清流遙睇崇嶺于焉遊盤寄興遐永放同觀濠高介
臨穎冷風徐來惕焉深省

叢木翳林薄構亭俯澗濱旭日散晴采光風媚芳春臨流
轉輕觴于以樂嘉賓詠歌意自適酣暢趣益真茲遊敦所
尚庶足酬令辰

四明沙門僧昇補任城呂本

遲遲春陽藹藹蘭苕樂爾嘉賓以宴以遨靖觀□□散懷
逍遙一觴一詠庶永今朝

襖飲祕園湖天氣淑且柔傳觴際曲渚濯纓臨□□纖條
亂風樹幽葩落晴溝衆賓亦樂止忘彼□□□

前平江儒學正徐昭文補府主簿后絲

柔風扇和百卉具芳攜我良疇憩于崇岡怡情詠歌激水
汎觴俯仰宇內聊以倘佯

茲辰天氣佳駕言寫我憂衣冠盛良會被襖俯長流川容
澹疎雨樹色翳崇丘清風接千載復此逍遙遊

祕園隱者鄭彝補山陰虞谷

興懷古先仰觀玄造尼歎逝川平念芳草暮春□□爰舒
幽抱皎焉白駒嚶其黃鳥

夙駕稅幽麓汎醴循流澗芳蕤被巖瀨葩萼□□靡靡
時運邁思賢撫嶢岼主欣遠賓集陶然□□□

前嘉興路經歷張溥補鎮國大將軍掾卞迪

萬萬雲岡溶溶春水集我朋儔撥茲蘭芷千載同口夷猶
芳軌美哉良會祈樂無已

茲辰暮春初散策臨泉石清渠引微波浮觴口前席伊人
去已遠古今同一適瞻茲脩禊地遙岑澹口口

東山僧福報補彭城曹謹

晴雲冉冉幽草茸茸羣賢戾止衍樂攸同芳葩泛豔翔羽
邇風亦有旨酒聊以從容

柔條扇循風輕波漾清旭羣彥此委蛇鳴佩集中谷列席
依巖迴飛觴隨水曲緬懷古先哲庶以繼遐躅

右碑在餘姚縣學宮近年墻壓碑壞此從洪筠軒舊
藏拓本錄之碑分四層據序稱樞密鄧事謝理以下

得四十二人同脩袂事碑所存止仁本以下十二人
詩各二篇錢辛楣詹事疑當時本刻二碑而亡其一
朱竹垞靜志居詩話亦云四十二人名氏未能悉考
詩僅存者止此十二人則所見者亦僅此碑矣碑云
至正庚子又云自永和至今上下宇宙間千有八載
以永和九年下推之蓋元順帝至正二十年也